

A Yabixal

EB JUEZ

Yayc'aybal Adonibezec

1 ¹Axa max yun xin, a yet mayal camtok Josué, a masanil eb yet israelal, max k'anlej eb bay Jehová, mac tribual babel ok oc yin yak'on owal yetok eb cananeo. ²Max tak'wi Cham, max yaloni tol a tribual Judá chi oc yak'on owal yin babelal, tol a bay ok ak'lay tx'otx'. ³Yuj tu' xan a eb aj Judá max yawtej eb is yet conob, a ton eb yinatil Simeón, yet chi junanen ba eb, yin yion ec' eb tx'otx' tx'otx', cax ok yi' Judá tu', ok lajwok tu', cax ok yion pax ec' eb tx'otx' ok yi' pax Simeón. A eb yinatil Simeón tu', max cha' c'ul eb junanen ba yetok eb yinatil Judá. ⁴⁻⁵Caytu' max yun yak'on eb owal yetok eb cananeo, c'al yetok eb ferezeo, yujtol a Jehová max aon oc eb yul k'ab eb. A bay Bezec max ayc'ay lajoneb mil eb yuj eb. A c'apax jun cham Adonibezec, reyal Bezec xol eb max ak'wi owal tu'. ⁶Caxc'al mi max elaj cham, palta max tzakloj eb israel yintak, masantac'al max yal michchaj yuj eb, max c'upil eb txutxal yiximal k'ab, c'al txutxal yiximal yakan. ⁷Yuj tu xin, max yaloni: A yet yalantok, max wiel txutxal yiximal k'ab, c'al txutxal yiximal yakan 70 rey, max ayji ec' eb sic'on aj c'ajil loj yalan in meña. Palta a tinani' xin, lajan wal chin yut Dios axca max wut eb tu', xi. Max yiontok eb Adonibezec tu' bay Jerusalén, axa bay tu' max cami.

Yayc'aybal Jerusalén c'al Hebrón

⁸A eb is tribual Judá max oc yak'on owal yin conob Jerusalén, cax max yion eb. Max tzoc'on cam eb masanil anima, max yak'on tz'a eb conob tu'. ⁹Max lajwi tu', max oc pax eb yak'on owal yin eb cananeo, a ton eb cajan bay siquikal tx'otx', bay yul is makbej Néguev, yetokc'al bay ac'al-lak. ¹⁰Max oc c'apax eb yak'on owal yin eb cananeo bay conob Hebrón, ac'al oc chi ikon c'apax Quiriat-arba yet payxa, cax max ak'lay cam Sesay, Ahimán c'al Talmai yuj eb.

Yayc'aybal conob Debir*(Jos 15.15-19)*

¹¹Ayman max oc eb yak'on owal yin conob Debir, ac'al oc chi ikon Quiriat-sefer yet payxa. ¹²A cham Caleb max yak' is ti', tatol ay junok mac chi ak'on ayc'ay conob Debir, a bay chi yak' ix Acsa is cutz'in yistzilok. ¹³Max ayc'ay yuj Otoniel, is c'ajol Cenaz; a Cenaz tu' is tzunan yuxtak Caleb, xan max yak' cham Caleb tu' is cutz'in tu' yistzilok Otoniel. ¹⁴A yet lanan toj ix yetok Otoniel tu', max yalon bay ix tol chi k'an ix junok tx'otx' bay is mam. A yet max yilon cham Caleb tol chi aytek ix Acsa yiban no burro, max k'anlen bay ix axca ti':

—¿Tzet chach oni? xi bay ix.

¹⁵Max tak'wi ix bay is mam:

—Elok yin a c'ul chak'on a' nuk'lak aej ayin, yujtol a tx'otx' tx'otx' max ak' ayin bay Néguev, naba takin tx'otx' tx'otx', xi ix.

Max yak'on cham Caleb tu' junxa tx'otx' tx'otx' tol ay yaejal bay yiban ajtok, c'al bay yalan aytek bay ix.

A jantak tzet max ayc'ay yuj tribunal Judá c'al yuj Benjamín

¹⁶A eb yinatil Hobab quenita, a ton is ni' cham Moisés max el eb bay conobal an palma, yetok eb tribunal Judá, max toj eb cajay xol eb anima cajan bay tz'inan tx'otx' yul yet Judá bay Néguev, bay cawilal conob Arad. ¹⁷Caytu' max yun toj eb tribunal Judá, yetok eb yet Simeón, max oc eb yak'on owal yin eb cananeo cajan bay Sefat. Junelnej max yak' lajwok eb jun conob tu', yuj tu' xan max yak' eb yik jun lugar tu' Horma. ¹⁸Max yion c'apax eb conob Gaza, Ascalón c'al Ecrón, yetokc'al is tx'otx'al junjun conob tu' yinlak. ¹⁹Yujtol ajun Jehová yetok eb aj Judá, yuj tu' xan max je' yuj eb yak'on ayc'ay eb eb cajan bay tx'otx' siquialal tx'otx', yetokc'al eb cayjom, palta maj je' yel eb anima cajan bay ac'al yuj eb, yujtol a eb tu', ay is ch'en carruaje yet owal. ²⁰Max ak'lay tx'otx' Hebrón bay cham Caleb, axca max yun yaloncan cham Moisés. A Caleb tu', max ion el eb is yinatil eb oxwan c'ajol Anac. ²¹Axa pax eb tribunal Benjamín, maj je' yion el eb eb jebuseo bay Jerusalén. A eb jebuseo yetok eb tribunal Benjamín, junejc'al cajan ec' eb bay Jerusalén tu' tinani'.

Yayc'aybal Betel

²²⁻²³A eb yin yinatil José, max nabalnej el eb yak'on owal yin Betel, a ton jun conob tu' chi yik Luz yet payxa. A Jehová max colwaj yetok eb. Max chekontok eb ilom tx'otx' bay tu'. ²⁴A eb ilom tx'otx' tu', max yil eb yeltek jun winak bay conob tu', max yalon eb bay: Tatol ach ok on a tx'ox yin, tzetbil ok yun joctok bay yul conobal ti', c'am tzet ok ach jutej, xi eb. ²⁵Axa jun winak tu' max tx'oxon eb, yin tzetbil chi yun yoc eb bay jun conob tu'. Cax max tzoc'on cam eb masanil eb anima cajan ec' bay tu',

palta a jun max tx'oxon eb tu', max yak' mimanc'ulal eb yin, yetokc'al masanil eb cajan yetok yul yatut. ²⁶A jun winak tu', max toj bay is tx'otx' eb heteo, max watx'nen aj jun conob bay tu', max yak'on yik Luz, a ton is bi jun conob tu' chi binaj tinani'.

Juntzan conob maj ayc'ay yuj eb israel

²⁷A eb is tribual Manasés, maj yuktej el eb eb aj Bet-seán, eb aj Taanac, eb aj Dor, eb aj Ibleam c'al Meguido, c'al yetok yaldeail juntzan conob tu'. Caytu' max yun canc'al el eb cananeo cajan bay tu'. ²⁸A yet max aj wal can eb israel, axa yak'lay pural eb cananeo tu' yoc yin mulnajil yuj eb, palta maj yuktej el eb.

²⁹Ac'ala' c'apax eb yin is tribual Efraín, maj c'apax yiel eb cananeo cajan ec' bay Gezer, yuj tu xan a eb cananeo tu' max canc'al cajan bay tu'.

³⁰A eb tribual Zabulón, maj c'apax yiel eb, eb aj Quitarón yetok eb aj Naalal, yuj tu' xan a eb cananeo max canc'al cajan bay tu', palta max ak'lay pural eb yoc yin mulnajil.

³¹⁻³²Ac'ala' eb is tribual Aser, maj c'apax yiel eb eb cananeo cajan bay Aco, bay Sidón, bay Ahlab, bay Aczib, bay Helba, bay Afec, c'al bay Rehob. Max cajay ec' eb xol eb tu', yujtol maj el eb yuj eb.

³³Ac'ala' c'apax eb tribual Neftalí, maj c'apax yiel eb eb cananeo cajan bay Bet-semes, c'al bay Bet-anat, palta max ak'lay pural eb yoc yin mulnajil, xan max cajay eb xol eb bay tu'.

³⁴Maj chalay eb tribual Dan yuj eb amorreo bay ac'al, palta asan bay siquilal tx'otx' max can eb. ³⁵Caytu' max yun canc'al cajan eb amorreo tu' bay yich witzal Heres, bay Ajalón, c'al bay Saalbim, palta a wal yet max yion wal eb yinatil José yip xin, max ak'lay pural eb amorreo tu' yoc yin mulnajil.

³⁶A mojonal is tx'otx' eb amorreo tu', max tojtac'al bay witzal yet Acrabim, masantac'al chi apni bay Sela, cax chi tojc'al bay yiban ajtok tu'.

Max tx'ox ba Cham Yángel Jehová bay Boquim

2 ¹A bay Boquim max tx'oxaj ba Cham Yángel Jehová, petoj Cham bay Gilgal, max yalon bay eb conob Israel: Ayin max ex wieltek bay Egipto, cax max ex wiontek bay sat tx'otx' tx'otx' bay max wak' in ti' wak'on bay eb e yichmam, cax max waloni, tol c'am bak'in ok c'ayil jun in trato max wak' e yetok ti', ²asan tol c'amc'al junok trato che watx'nej yetok eb anima cajan bay sat tx'otx' tx'otx' bay cajan ex ec' ti', tol che c'ayil yaltar eb bay chi txajli, palta ayex ti', c'am che yikej. ¿Tzet yuj xan che yun jun ti'? ³Yuj tu' xan chi walcan ayex, tol man ok wiel juntzan conob ti' e xol, asan ajc'ulal ok ayjok e xol yetok eb, c'al e yayc'ay yuj is diosal eb, xi Cham ángel tu'.

⁴Max lajwi k'anjab Cham ángel tu', cax masanil eb conob max ok'aj eb yin ipejal, ⁵yuj tu' xan Boquim max yikcan jun lugar tu'. Max yak'on eb xajanbal bay tu' bay Jehová.

Is camichal cham Josué*(Jos 24.29-31)*

⁶Ayxatax k'anjab can cham Josué bay conob Israel tu', cax atax yet tu' max tojcan junjun eb bay is satak chabilxa yuj. ⁷Yikemc'al eb conob yoc yin ayilal bay Jehová yak'ban ayto ec' cham Josué tu', yetokc'al eb yicham winakil conob tzunanxa max camtok yintak cham, a ton eb cham max ilon tzetak yetal c'ayubtak max yun Jehová yuj is watx'ilok conob Israel tu'. ⁸110 abil is k'inal cham Josué is chekbej Jehová yet max cami. ⁹A tu' max mukay bay is satak bay tx'otx' Timnat-sera bay sataktok is witzal Gaas, bay siquial tx'otx' yul yet Efraín.

Max yiel ba eb israel yin Jehová

¹⁰Max cam c'apaxtok eb anima max ec' yetok Josué. Axa eb max alji yinxac'al tzunanil tu', manxa yojtakok eb Jehová, cax majxa yil eb tzet yetal tol c'ayubtak max yun Cham yuj is watx'ilok eb. ¹¹Yuj tu xin, axac'al masanil yobtakil max yun eb conob Israel satak Jehová. Max oc eb yin ayilal bay comon dios chi yik Baal. ¹²Max yixac'al el ba eb yin Jehová Diosal is yichmam eb, Cham max ion eltek eb bay Egipto. Max oc eb yin ayilal bay is diosal eb anima cajan bay yinlak eb tu'. Max tx'emontek eb yowal c'ul Jehová, ¹³yujtol max beklaycan Cham yuj eb, axac'al bay comon dios Baal, c'al bay Astarté max oc eb ayilal. ¹⁴Yuj wal tu xin, caw wal max tit yowal c'ul Jehová yin eb, max beklay eb yuj bay yul is k'ab eb ajc'ul, cax max elk'anelaytok is tzetak yetal eb, majxac'al je' colon ba eb bay eb ajc'ul tu'. ¹⁵A yet chi toj eb israel tu' yak'on owal yin eb is yajc'ul, max alay oc eb yul k'ab eb ajc'ul tu' yuj Jehová, axca max yun yalon Cham. Yuj tu' caw wal ok'bal c'ul max yun eb.

¹⁶Caw wal chi etax eb israel yuj is yajc'ul junjuntak el, xan max yiaj wan Jehová juntzan is colomal eb, yet chi col-lay el eb yul k'ab eb elk'om tu'. ¹⁷Palta majc'al yikej eb bay eb max aj wan colwaj yin eb tu' yuj Jehová, c'am wal jabok max yikej eb bay Cham. A ti' yet eb, tol ayc'al oc eb yin ayilal bay comon dios. Max yionxac'al el ba eb yintak beybal eb is yichmam eb, tol max yikej eb tu' bay is chekbanil Jehová. ¹⁸Junjuntak c'al el, chi el yaw eb yuj is yailal, yuj tzet chi utlay eb yuj is yajc'ul; axa Jehová chi ok' is c'ul yin eb, cax max yaontek jun is colwajwom eb. Yak'ban iquis ec' jun is colwajwom eb tu', ayoc Cham yetok, cax max col-lay el eb yuj bay eb ajc'ul tu'. ¹⁹Axa max camtok is colwajwom tu xin, cax chi oc paxcan eb yin yobtakil tol yelxac'al yob yintak beybal yichmam eb, c'al yoc eb yin ayilal bay comon dios. C'am chi bekcan eb yob beybalej tu', tenomtak eb bay Jehová. ²⁰Yuj wal tu' xan max tit yowal c'ul Cham yin eb, max naon Cham axca ti': A juntzan anima ti', caw wal c'am jabok chi yikej eb in trato max wak' yetok is yichmam eb. ²¹A yuj tu xin, xan manxa ok wiel xol eb juntzanxa eb anima maxto cancan yuj Josué yet max cami. ²²Ok canc'al can eb,

yuj wak'on porobal is nabal eb israel ti', ta chi tzakloj eb wintak, axca max yun eb yichmam eb, ma c'amak, xi Cham. ²³A wal yuj tu xan, majxa yiel Jehová jantak eb anima ayic' bay xol eb conob Israel tu', a ton juntzan majto yaoc Cham yul is k'ab cham Josué, tol maxto cancan eb yuj Cham bay tu'.

Juntzanxa conob max cancan bay tx'otx' Canaán

3 ¹A ton juntzan conoblak tu' maxto cancan yuj Jehová bay tx'otx' Canaán, yet watx' chi ak'lay porobal eb israel, a ton eb c'amto chi alji yet max oc owal, yet max ayc'ay tx'otx' Canaán tu'. ²Max cancan juntzan conob tu' yuj Jehová, yet watx' chi cuyba eb c'amtoc'al bay max oc yin owal junelok. ³Oyeb conobal eb filisteo max cani, yetok masanil eb cananeo, eb sidonio, c'al yetok eb heveo, a ton eb max ec'lej cajan bay siquikal tx'otx' Líbano, chi tojtac'al bay jolom witz Baal-hermón, masantac'al bay chon octok bay Hamat. ⁴A yuj juntzan eb tu', xan max ak'lay porobal eb israel yuj Jehová, yet watx' chi yil Cham, ta chi yikej eb masanil chekbanilej max cheklay yal Moisés yuj Cham bay yichmam eb. ⁵Caytu' max yun yayji ec' eb israel xol eb cananeo, eb heteo, eb amorreo, eb ferezeo, eb heveo, c'al xol eb jebuseo. ⁶Axa is c'ajol eb, c'al is cutz'in eb israel tu', max yilej aj ba yetok is c'ajol, c'al is cutz'in eb conoblak tu', axa yoc eb ayilal bay is diosal eb tu'.

A Otoniel max colon eb israel bay Cusan-risataim

⁷Caw wal yob tzet max yun eb israel satak Jehová is Diosal eb, yujtol max tojcan Cham c'ayc'ulal yuj eb, axac'al bay yechel Baal, c'al bay yechel Astarté max oc eb ayilal. ⁸Yuj wal tu', max tit yowal c'ul Jehová yin eb, xan max alay oc eb yuj yul k'ab Cusan-risataim, rey bay Mesopotamia. Waxakeb abil max ak'lay serbil jun rey tu' yuj eb israel tu', ⁹masantac'al max yal tewi eb bay Jehová, axa Cham max oc yetok Otoniel, xan a' max oc yin yajawilal yin colon el eb. A Otoniel tu', is c'ajol Cenaz. A Cenaz tu', is tzunan yuxtak Caleb. ¹⁰A Yespíritu Jehová max oc yin Otoniel, xan a' max oc is yajawilok eb israel. Max toj yin owal, axa Jehová max colwaj yetok, xan max ayc'ay Cusan-risataim yuj.

¹¹A yet max lajwi ec' juntzan tu', max beytok eb israel yin junc'ulal yin cawinak abil masantac'al yet max cam Otoniel c'ajol Cenaz.

A Aod max colon Israel bay eb aj Moab

¹²Lajwi tu', max oc pax eb israel yunen yobtakilal satak Jehová junelxa, yuj tu' max ak'lay yipalil Eglón, reyal Moab yuj Jehová yintak eb israel. ¹³Max junanej Eglón is nabal yetok eb amonita, c'al yetok eb amalecita, max oc eb yak'on owal yin Israel, max yion eb conobal an palma. ¹⁴¹⁸Max ak'lay serbil Eglón yuj eb israel, ¹⁵masantac'al max yal tewi eb bay Jehová. Catatu' max yaon oc Cham junxa colwajwom, a ton Aod is c'ajol Gera, titnak yin is tribual Benjamín, tol a is q'uexan k'ab chi mulnaji.

Ay jun c'ual max cheklaytok Aod tu' ak'ojcan tojlabal yuj eb israel bay Eglón, reyal Moab. ¹⁶Axa Aod tu' max watx'nej jun is yespada tol ay ye ca paq'uul, nan metro is tel, max yaon oc yin is cincho bay yetc'ulal is watx' k'ab bay yul is pichil. ¹⁷Max yiontok ch'en tojlabal tu' yin aymanil bay Eglón. Caw wal bak'ech jun cham rey tu'. ¹⁸A yet mayal lajwi yak'oncan ch'en tojlabal tu' bay cham Eglón tu', max eltek yetok eb ajun yetok. ¹⁹Palta a yet max apni oc bay juntzan yechelej bay cawilal Gilgal, max meltzoy Aod tu' bay Eglón junelxa, max yalon bay axca ti':

—Ay wal jun k'anej ok wal ayach mamin rey, palta yin ewantakil ok wal ayach, xi bay.

Max yalon cham rey bay masanil eb ayoc yin opiso bay tu', tol chi eltok eb bay yina. ²⁰Yuj tu xin, asanxanej eb cawanil max cani, chotan ay cham rey bay yul jun cuarto siclabinak yul bay can, max jayoc Aod is cawilal, max yalon bay:

—A jun k'anej ibil oc wuj ok wal ayach ti', yet Dios, xi.

A yet max yaben Eglón axca tu', max aj wan bay is xila, ²¹palta axa Aod xin, tutun q'uexan k'ab chi mulnaji, xan max yaonnajtok is q'uexan k'ab tu' bay yetc'ulal is watx' k'ab, max yion ajtek yespada, max jekontok yul is c'ul cham Eglón tu'. ²²Yetok masanil yip max jekon oc yin c'ul tu', mannejnak ch'en espada tu' max toj jeknajok, palta max tojxac'al c'apax yakan ch'en, max k'axpoj elapnok txam ch'en bay yintak, axa bak'echal tu' max makchen bay max ec'oc ch'en, xan majxa yieltek Aod tu' ch'en. ²³Lajwi tu', max eltek Aod, max makchencan eltek puerta, max yaoncan oc llaveal.

²⁴Axa yet mayal toj xin, catatu' max jayoc eb chi taynen cham rey tu', max yilon eb tol makan puerta. A naon eb tol max makchej cham puerta, yet chi toj cham txuljok yalon eb. ²⁵Palta max yechbanejc'al eb xin, axa c'oli somchaj aj c'ul eb tu', yujtol c'amc'al chi eltek cham rey tu'. Axa yiontek eb llaveal puerta tu', max jakon eb, max yilon eb tol camnakxa, cax toxac'al jaban ay cham sat tx'otx'.

²⁶Yak'ban chi ec'c'al tiempo eb axca tu', axa Aod mayal toj elajok. A yet mayal ec'tok bay ay juntzan yechelej bay Gilgal, max toj elaj bay yul yet Seirat. ²⁷Axa yet max apni oc bay siquial tx'otx' yet Efraín, max xuon cacho yuj wajban oc eb yet israelal. Junnejxac'al max yun yaytek eb bay jolom witz tu', babel Aod tu' yuj eb. ²⁸Max yalon Aod tu' bay eb: Ocanek tzakan wintak, yujtol mayal yaoc Jehová eb moabita ajc'ul oc jin yul co k'ab, xi. Xan max toj eb yetok xin, max apni oc eb makon bay taxbal bay a' Jordán, c'amxa junok mactxel max cha' k'axpoj eb. ²⁹A yet jun tiempoal tu' max mak'cam eb lajoneb mil eb moabita, a ton juntzan soldado caw wal tec'an waayi, c'amxa junok max elcan yin yiquisal. ³⁰Cay wal tu' max yun yayc'ay eb yuj eb israel. Max lajwi tu' xin, c'amxac'al owal yul is makbej Israel yin 80 abil.

A Samgar max colon eb israel bay eb filisteo

³¹A yintak Aod max colwaj c'apax Samgar, is c'ajol Anat. Max mak'cam 600 eb filisteo yetok jun chuchbal wacax, xan max col-lay Israel yuj Samgar tu'.

Max ayc'ay cham Sísara yuj xal Débora yetok cham Barac

4 ¹A yet mayal cam Aod, cax max meltzotj paxtok eb conob Israel yin yobtakil junelxa, caytu' max yun tx'emonpaxtek eb yowal c'ul Jehová. ²A wal yuj tu' xan max yaoc Cham eb israel yul is k'ab Jabín, is reyal eb cananeo ay bay conob Hazor. A is yajawil eb is soldado cham rey tu', a ton Sísara, a tu' ayic' bay Haroset-goim. ³Ay 900 carruaje cham Jabín tu', tol naba hierro. Junc'al wal abil ayoc conob Israel yul is k'ab jun rey tu'. Caw wal max etax eb yuj. Yuj wal tu' xan max aj yaw eb bay Jehová yin ok'il, ta chi col-lay eb yuj.

⁴A yet jun tiempoal tu', a xal Débora is chekbej Jehová chi watx'nen el is k'anej eb conob Israel, cax is yistzil cham Lapidot yayji xal. ⁵A xal Débora tu', a tu' chi ayc'alta' chotan bay yich jun an palma bay tx'otx' siquilal tx'otx' yul yet Efraín, bay nan xol Betel yetok Ramá. A ta tu' chi betic' eb conob Israel watx'nej is k'anej bay xal. Yuj tu' xan max ak'laycan yik an palma tu', is palma xal Débora.

⁶A yet jun tiempoal tu' ay jun winak chi yik Barac, is c'ajol Abinoam cajan bay Cedés, yul yet is tribual Neftalí. Max awtelay cham yuj xal Débora, max yalon xal bay:

—A Jehová co Diosal chi alon ayach: Asi' bay jolom witz Tabor, cax cha wajbantok lajoneb mil soldado yet is tribual Neftalí, c'al yet is tribual Zabulón. ⁷Ayin ok wak' tit cham Sísara, is yajawil eb soldado yet cham Jabín bay is ti a' Cisón, cax ok yak'on owal etok, yetok is carruaje, c'al eb is soldado; ayinx a ok waoc eb yul a k'ab, xi Jehová, xi xal Débora.

⁸—Chin toji, tatol ach jun chach toj wetok. Ta c'am chach toj xin, c'am chin toji, xi cham Barac tu' bay xal.

⁹—Chin toji, palta xin, manak ach ok ach binaj yuj ak'on ayc'ay jun owal tu', yujtol a yul is k'ab jun ix ix ok yaoc Jehová cham Sísara tu', xi xal.

Max lajwi tu xin, max toj xal Débora yetok cham Barac bay Cedés. ¹⁰Cax max wajban oc cham Barac tu' lajoneb mil eb soldado xol is tribual Zabulón, c'al yin yet Neftalí, cax max toj eb yetok; ajun c'apax xal Débora yetok eb.

¹¹A bay is cawilal Cedés tu', bay ay te matx'ji yet Zaanaim, a tu' ay is campamento jun quenita chi yik Heber. A' maxax pojil ba bay xol eb yet quenitail, a ton eb yinatil Hobab, is ni' cham Moisés. ¹²A yet max yaben cham Sísara tol mayal ajapnok cham Barac bay jolom witz Tabor, ¹³cax max wajban oc cham masanil is carruaje, 900 yin masanil, yetok masanil is soldado, cax max el bay Haroset-goim, cax max apni oc bay ti a' Cisón.

¹⁴Max lajwi tu', axa yalon xal Débora bay cham Barac axca ti':

—Asi', babelxa toj Jehová a satak, cax a' ok aon oc cham Sísara yul a k'ab tinani', xi xal.

Axa yaytek cham Barac yetok eb lajoneb mil soldado bay jolom witz Tabor tu'. ¹⁵A yet max chaon oc cham Barac tu' owal, yin aymanil max yaoc Jehová jun miman xiwc'ulal yiban eb anima inej oc masanil carruaje naba ch'en tu', yetokc'al eb soldado, axa cham Sísara max aytek bay yul is carruaje, cax max toj yin elilal. ¹⁶Max toj cham Barac yintak cham Sísara, yetokc'al yintak eb soldado, yetokc'al ch'en carruaje, masantac'al max apni oc bay Haroset-goim. A yet jun c'ual tu', c'amxa junok is soldado cham Sísara maxto cani, palta max cam eb masanil.

¹⁷A Heber yetokc'al eb yican, watx' yak'on yetok Jabín, is reyal Hazor. Yuj tu', a tu' max toj cham Sísara col ba. A tu' max apni oc bay is mantiado ix Jael, is yistzil Heber tu'. ¹⁸Max eltek ix chaoni, max yalon bay axca ti':

—Ocan mamin, manchak ach xiwi, xi ix bay.

Axa yoctok cham Sísara tu' bay yul is mantiado ix tu', max yiontek ix jun sámana, max yaontok yiban yet chi c'ubelay el cham yuj ix. ¹⁹Max lajwi tu' max k'anon cham aej yuc' bay ix, yujtol caw wal ay is takintial. Yinxac'al aymanil max yiel ix is makil jun no tz'um bay c'uan is leche, max yak'on ix yuq'uej. Lajwi tu' max makchelay pax ay cham yuj ix. ²⁰Max yalon cham Sísara bay ix:

—Canan bay ti' mantiado ti'. Ta ay mac chi ul k'anlenok ta ay mac ayic' cayti', cax chalonil tol c'am mactxel ayic'ok, xi cham bay ix.

²¹Lajwi tu' max camil cham Sísara wayi, yujtol caw wal c'umbinak cham. Max yiontek ix Jael tu' jun estaca yetok jun te mak'bal ay estaca, yet mitx'bal ay mantiado. Caw wal camnak el cham yuj wayan, cax yin c'ojanc'ulalil max toj ix c'atan, max mak'on aytok ix te estaca tu' yul is jolom cham, bay yetc'ulal is nabal, masantac'al max yal k'axpoj ec' ay te', cax max tojcan te' yul tx'otx'. Caytu' max yun cam cham yuj ix ix tu'. ²²Axa yet max apni oc cham Barac sayon ec' cham Sísara tu' xin, ayman max eltek lemnaj ix chaon cham, cax max yalon ix:

—Ocantek, ul il mactxel cha sayic' tu', xi ix.

Axa yet max ocapnok cham Barac bay yul mantiado tu', max yiloni, tol camnakxa el cham Sísara, cax mak'bil aytok te estaca yul is jolom.

²³Axca tu' max yun yayc'ay cham Jabín, is reyal eb cananeo yuj Dios satak eb israel, ²⁴xan max lowxac'al is k'ab eb israel yin cham Jabín, masantac'al max yal c'ayilok.

Is bit xal Débora yetok cham Barac

5 ¹A wal yet tu', max bitnej xal Débora jun is bit yetok cham Barac, is c'ajol Abinoam:

²Bitnejek is mayk'ak'al Jehová, yujtol wal yel ay eb yajawil conob israel bekan c'ul toj yin owal, ay c'apax eb soldado bay co conobal ti' max tak'wi toj yin owal.

- 3 ¡Abek tzet ok wal ayex rey ex ti! ¡Abek ayex yajaw ex ti!, tol chin bitni bay Jehová! ¡Tol chin bitnej co Diosal ayon conob Israel on ti!
- 4 A yet max cach el bay Seir Mamin Jehová, yet max cach el bay tx'otx' Edom, caw wal max bil tx'otx' tx'otx', max a bekon c'apax aytek nab.
- 5 A a satak Mamin Jehová co Diosal, caw wal max bilaj witz, max bilaj witzal Sinaí.
- 6 A yul is tiempoal Samgar, is c'ajol Anat, c'al yul is tiempoal ix Jael, masanil eb ec'jabwom majxa ec' eb bay yul-lak mimek be, axac'al bay q'uexbelak max ec' eb.
- 7 Masanil lanchual mulnajbal bay eb israel max can tz'inanok. Axa yet jun tiempoal tu' max in aj can, ayin Débora in ti', max in oc yin txutxejal xol conob Israel ti'.
- 8 A yet tu' max sayic' eb jet conob tx'ok diosal, xan max apni oc owal bay puertail-lak co conob. C'am makbal julbalej, tamwal lanza max jil xol 40,000 soldado jet israelal.
- 9 A wanimail, axq'uijan tol ajun yetok eb yajawil in conob, c'al yetok eb conob bekan c'ul toj yin owal tu'. Jiek aj can is mayk'ak'al Jehová.
- 10 Alek tzet max yun Jehová ex mimek winak, ex chex ajtok yiban no sakyin burro, manxa watx'ilok tz'am ayajok. Alek c'apax ayex tol chex bey ti'.
- 11 Caw wal najat chi bey nuk' son e yuj, c'al platillo baytak ay a' uc'bala'. Che yion aj can Jehová, yujtol mayal ak'lay lajwok eb jajc'ul yuj Cham, c'al yuj eb mulnajwom cajan bay aldealak yul co nación ti'. Catatu' max je' co meltzoj aytek ayon conob on Jehová ti' bay cajan on junjun on.
- 12 Ach Débora, ikbajwom yin bit xol anima, cax chi oc tzakan eb entak. A pax ach Barac, c'ajol Abinoam, asi', cax cheontok eb preso yayji oj.
- 13 Max lajwi tu', cax max ayol eb yajawil eb co conob yak'on owal. Max ayol is soldado Jehová yak'on owal yetok eb soldado tec'an.
- 14 Max ay c'apax ul eb yet is tribual Efraín bay ac'al. Babel max ay c'apax ul eb yet is tribual Benjamín. Max ay c'apax ul eb capitaniil eb is soldado Maquir, c'al eb ikbajwom xol conob yet Zabulón.
- 15 Max oc pax eb yajawil conob yet is tribual Isacar colwajwomal bay xal Débora. Eb is tribual Isacar tu', max oc pax eb yipomalok cham Barac, max toj lemnaj eb yetok yin owal bay jobe.

A eb xol is tribual Rubén ayoc eb yin cabc'ulal.

- 16 ¿Tzet yuj xan max ex cancan bay chi makay no calnel, cax che yaben yul is nuk' eb nak ilom calnel yet chi yawten eb nak no'? Wal yel, a xol is tribual Rubén ay cabc'ulal.
- 17 Axa pax eb aj Galaad xin, max cancan eb bay k'axepal ec'tok a' Jordán. Axa pax yinatil Dan, max cancan bay c'atan bay ay te barco, axa pax bay is ti a' mar, max cancan is yinatil Aser, cax majxac'al jitz el ba eb bay cawilal puerto.
- 18 Axa bay chi oc owal max toj yinatil Zabulón, c'al yinatil Neftalí, max bekbac'al eb is k'inal yul k'ab camich.
- 19 Max lajwi tu', max jayoc eb reyal eb cananeo bay Taanac, bay is cawilal a' Meguido, cax max jayoc eb reyal cananeo yak'on owal yaloni, palta c'amc'al ch'en plata, tamwal beyomal max yi eb.
- 20 A tac'al bay satcan, c'al is bealak bay satcan tu' max yak' waycan owal yetok cham Sísara.
- 21 A a' aej Cisón, a' payxail aej, max ikon bey eb masanil. Max co tec'on ay eb caw wal ay yip.
- 22 Caw wal max bil yayc'ay yakan no chej, yet max toj lemnaj no' yin owal.
- 23 Max k'anjab cham yángel Jehová: Titokab yowal c'ul Jehová yiban conob Meroz; titokab yiban masanil eb winak bay tu', yujtol maj colwaj eb yetok Jehová yin owal, axca eb soldado a' ijan, xi Cham.
- 24 Watx' yet Jael, ix yistzil cham Heber quenita, yintak masanil eb ix ix. Watx' yet ix yintak masanil eb ix cajan yulak mantiado.
- 25 A yet max k'anon cham Sísara yuc' aej, leche max yak' ix Jael tu' yuq'uej, cax max yak'on crema is lobejok bay yul jun sec' tol manxa watx'ilok.
- 26 Max yion aj ix jun te estaca yetok is q'uexan k'ab, cax max yion aj ix te mak'bal ay estaca tu' yetok is watx' k'ab. Max lajwi tu' max mak'on aytok ix te' bay yul is jolom cham, max k'axpoj aytok te' bay yul tx'otx'.
- 27 Toxac'al max ec' balbon cham bay yakantak ix Jael yuj is yail. Caytu' max yun yel jaban camilok.
- 28 Caw wal tacnaxac'al is c'ul xal is txutx cham Sísara yet max eltek t'anan bay wentenail is yatut. Max yaloni: ¿Tzet yuj xan caw wal chi ec' is tiempo bey yul carruaje? ¿Tzet yuj xan chi mayji jayoc is carruaje tu' yin owal? xi xal.
- 29 Max tak'wi junok eb ix aj nabal ayic' bay is c'atan xal txutxey tu'. Ac'ala', axca tu' max yun naon c'apax xal txutxey tu', max yalon eb axca ti':

³⁰ Tol mi lanan pojón ec' eb jantak tzetak yetal max yi' eb yin owal tu'. Lanan mi sic'len eb nak jun junok eb ix ix chi yi', ma xin catakwanok eb ix yet junjun eb nak, ma xin, a mi wal an pichilej caw wal tol watx' chi sic'lej Sísara tu'. A mi wal an caw wal watx' yoc is yelbub bay junjun paq'uil chi sic'lej, yet watx' ok yaoc eb yin is nuk', tutun tol max ayc'ay yuj xin, xi mi eb.

³¹ Axcaokab tu' chi yun c'ayil eb ajc'ul oc en Mamin Jehová. Lajanokab eb mactaktxel chach ocheni, axca wal jopopial yakan c'u yet chi ajolok, xi xal Débora, c'al cham Barac yin is bit.

A yet max lajwi jun owal tu', c'amxa owal yin cawinak abil.

Max awtelay Gedeón yuj Dios

6 ¹ Caw wal yob tzet max yun pax eb conob Israel satak Jehová. Yuj wal tu' xan max alay oc eb ukeb abil yul k'ab eb madianita. ² Max occ'al eb israel yin yatakilal yuj eb madianita tu'. Yuj wal eb xan max watx'nej eb olan yinlak witz bay chi c'ubaj el ba eb, cax chi c'uban c'apax el ba eb bay yulak nach'en, c'al bay yatak yapni oc anima, a tu' max octok cajan eb. ³ Axa eb madianita tu', yetokc'al eb amalecita, yetokc'al juntzanxa eb cajan bay yetc'ulal bay chi ajol c'u, a yet chi yilon eb tol ayxa janic'ok tzet awbil yuj eb israel, cax chi bet etnelay eb yuj eb. ⁴ Max bet watx'nej aj eb is campamento bay sat is tx'otx' eb israel, max yetnentok eb masanil tzet yetal awbil yuj eb, masantac'al chi apni oc eb bay Gaza. C'amxa janic'ok tzet chi cancan yuj eb yet chi lo eb israel, cax chi yelk'anentok eb no calnel, no wacax c'al yetok no burro. ⁵ Max watx'nej aj eb is campamento, cax chi yiontok eb masanil no' is jobbejal no' bay sat tx'otx' is tx'otx' eb israel. Masanil tzet yetal ay bay sat tx'otx' max lajwi el masanil. Chi apni oc bulolok no camello yuj eb, axca wal chi yuncantok sat tx'otx' yuj no chapulín, caywal tu' chi yuncantok tx'otx' yuj no'. ⁶ Caywal tu' max yuncan eb israel yin mebail yuj tzet max utlay eb yuj eb madianita tu'. Yuj wal tu' xan max cusaj c'ul eb israel, max aj yaw eb k'anon is colwal Jehová.

⁷ Max occ'al ijan eb israel k'anon is colwal Jehová yet watx' chi col-lay eb yul is k'ab eb madianita. ⁸ Yuj tu xin, max yatek Jehová jun is chekbej yet chi yala': Axca ti' yalon Jehová co Diosal: Ayin max ex wieltek bay Egipto, bay ayex oc yin mosejal. ⁹ Mannejc'alnak tol max ex eltek bay tu', palta masanilc'al eb max ex etneni, max el eb e satak, cax max ex in colon el bay eb, yin bulquiltakil max yun wion el eb yulak e be, max wak'on is tx'otx' eb ayex. ¹⁰ Max wal ayex tzetbil tol ayin Jehová e Diosal in. Max walón ayex, tol c'am chex xiw bay is diosal eb amorreo bay tx'otx' tx'otx' bay ayex ec' ti', palta caw wal maj e yikey bay tzet max wala', xi Jehová, xi jun is chekbej tu'.

¹¹Max lajwi tu', max toj ay chotan Cham yángel Jehová bay yich jun te ji' bay sat tx'otx' jun cham chi yik Joás, is yinatil Abiezer. Axa Joás tu' ay jun is c'ajol chi yik Gedeón. A yet jun tiempoal tu', lanan mak'wi trigo Gedeón yin ewantakil. Yet c'am chi yil eb madianita, a bay chi tec'lay el yal an uva, a tu' chi mak'wi trigo.

¹²A tu' max tx'ox ba Cham yángel Jehová bay Gedeón, cax max yaloni:

—Manchak ach xiwi, ach soldado watx', tol tec'an a waayi. A Jehová ayoc etok, xi bay.

¹³Max tak'wi Gedeón:

—Ak' mimanc'ulal win Mamin, ay tzet ok wal ayach. Ta ayoc Jehová jetok, ¿tzet yuj xan axca ti' chi jay jiban on? ¿Baytal ay milagro tinani' axca max yun yalon eb jichmam ayon yet max ilay eltek eb bay Egipto? Bekbil onxa can yuj Jehová, mayal on yacan oc Cham yul k'ab eb madianita, xi Gedeón.

¹⁴Max oc t'anan Jehová yin, cax max yaloni:

—Ayin chach watok, manchak ach oc il, ak'balnej epalil chi wak'a', yin a colon et conob Israel bay eb madianita, xi Jehová.

¹⁵Cax max tak'wi Gedeón axca ti':

—Ak' mimanc'ulal yin tzet ok wal ayach Mamin. ¿Tzet wal ok yun in colon eb wet conob Israel ti'? Meba' anima on yin is tribual Manasés, cax ayinxac'al tzunan unin in xol eb wuřtak, xi Gedeón.

¹⁶Max yalon pax Jehová:

—Ayin oc etok, xan ok je' oj. Ok ayc'ay eb madianita oj, axcac'al chi yun yayc'ay junok winak tx'oklil.

¹⁷Yuj wal tu' xan max yal Gedeón:

—Mamin, ta watx' in yul a sat, ak' junok yechelej ayin, yet watx' ok nachaj el wuj, tol chekbej ach Dios. ¹⁸A tinani', elok wal yin a c'ul, tol c'am chach el cayti', tol ok witek junok in xajanbal ayach, xi Gedeón.

Max tak'wi Jehová:

—Ti ok ach wechbanej, masantac'al ok ach jayok, xi Cham.

¹⁹Max toj Gedeón watx'nej el jun no yune' chiwo, max watx'nen ixim pan tol c'am yich, yetok jun echbal harina. Lajwi watx'ji el is ca makanil yuj, max yaon aytok no chibej tu' bay yul jun motx, axa is yal no' max yaaytok yul jun xij, max yiontok bay yich te ji' tu'. ²⁰Cax max yalon Cham yángel Jehová tu' bay axca ti': Aay no chibej tu', yetok ixim pan c'am yich tu' yiban jun ch'en ch'en ti', cax cha tz'anon ay is yal no' tu' yiban, xi Cham. Cax max yiken Gedeón masanil tzet max al-lay tu'. ²¹Axa Cham yángel Jehová max tenoc txam is k'okoch yin no chibej tu', c'al yin ixim pan, cax max ajol k'ak'ej yul ch'en miman ch'en tu', cax max tz'aay no' chibej tu' yetok ixim pan, cax yin aymanil max c'ayaj Cham yángel Jehová tu' is satak. ²²Caytu' max yun nachaj el yuj Gedeón, tol yel a Cham yángel Jehová max k'anjab yetok, cax max yalon yin xiwc'ulalil axca ti':

—Mamin Jehová, caw wal yin ac-'omba satil max in k'anjab yetok Cham ángel, xi Gedeón.

²³Max yalon Jehová bay Gedeón:

—Manchak ach xiwi, c'am chach oc il, man ok ach camok, xi Cham.

²⁴Max watx'nen aj Gedeón jun altar bay tu' yuj yion can is bi Jehová, cax max yaon oc is bi Cham axca ti': A Jehová Cham Ak'om Junc'ulal. A jun altar tu' ayto ec' bay Ofra tinani', yul is makbej yinatil Abiezer.

²⁵A yet jun ak'bal tu' max yal Jehová bay Gedeón:

—Cheiltek junok no toro bay xol is wacax a mam, no' yet is cab yune no' is wacax tu', ukeb abil is k'inal, cax chochon ay yaltaril Baal watx'nebil aj yuj a mam, cax cha k'akon aj te te' tol ya' yili ayaj bay c'atan altar tu'. ²⁶A bay yiban jolom ch'en miman ch'en tu' cha watx'nejcan aj altar ayin, Jehová a Diosal in. Yet wal jun bek tu', cax chak'on cam no toro tu', cax chak'on tz'aok. A te te' tol ya' yili tu', a te' chaoc yin sial, cax chak'on tz'a xajanbal tu' yiban, xi Cham.

²⁷Xan max toj Gedeón yiontek lajonwan chekbej max mulnaj oc yin, cax max yiken axca max yun yalon Jehová. Palta max xiw watx'nen yet c'ualil, yuj eb yican is mam, c'al yuj eb anima bay conob tu', xan a yet ak'balil max watx'nej. ²⁸A yet max k'inibi aj yet junxa c'ual, max yilontek eb anima aj conob tu', tol mayal uchlay ay altar yet is diosal eb chi yik Baal, c'al yetok te te' tol ya' yili ayaj bay altar tu', mayal k'aklay ajok. Max yaben c'apax eb, tzetbil tol ay jun no toro max ak'lay tz'a yin xajanbalil yiban jun ac' altar. ²⁹Cax max k'anlen ec' eb: ¿Mac max uten jun ti'? xi eb.

Max lajwic'al yec' eb k'anlen yabeb, cax max abchajtek, tol a' Gedeón, is c'ajol Joás max uten axca tu'. Yuj tu' xan max yal eb bay Joás axca ti':

³⁰—I eltek a c'ajol tu', cax chi co mak'on camok. ¿Tzet yuj xan max yuchay nak altar yet Baal, c'al k'akon aj nak te te' tol ya' yili bay is c'atan tu'? xi eb anima tu'.

³¹Cax max tak'wi Joás bay masanil eb anima oyan oc yin tu' axca ti':

—¿Tom che col jun Baal tu', cax che yak'on yowalil? Ta axca tu', camokab jun mac chi colon Baal tu', yak'ban c'amto chi sakbi elok. Ta yel tol Dios jun Baal tu', colokab ba yul yet, yujtol a' ay yet jun altar max uchlay ay tu', xi Joás.

³²A wal yet tu' max yak' eb anima yik Gedeón tu' Jerobaal, cax max yalon eb: Colokab ba jun Baal tu' bay, xi eb. Yujtol a Gedeón max ak'on ayc'ay yaltaril Baal.

³³Max lajwi tu xin, max wajban oc ba eb madianita, yetokc'al eb amalecita, yetokc'al eb cajan bay yetc'ulal bay chi ajol c'u, max k'axpoj eb bay yul a' Jordán, cax max watx'nen aj eb is campamento bay ac'al Jezreel.

³⁴Yin wal aymanil max oc Yespíritu Jehová yin Gedeón; a yet max xun jun no cacho, max wajban ba eb yinatil Abiezer yetok. ³⁵Max yaon c'apaxtok is chekbej bay eb is tribunal Manasés, ta chi yaoc ba eb nak tu' yetok eb, yetok c'apax eb is tribunal Aser, c'al yetok yet Zabulón c'al yetok yet Neftalí.

³⁶Max yalon Gedeón bay Dios: Ta wal yel ayin chin a k'anbalnej yet cha colon el conob Israel, axca wal alon ti', tx'ox junok yechelej ayin. ³⁷A tinani',

ok wacan ay jun no tz'umal calnel tol pim is xil, bay yul tec'bal trigo. Axa yet k'inib yecal xin, ta caw wal ch'acan no tz'um tu', axa pax bay sat tx'otx' bay yinlak no', caw wal takin, axca tu' ok yun wojtaknen elok, tol yel ayin ok in a k'anbalnej yet ok a colon el a conob Israel, axca max yun aloni, xi Gedeón.

³⁸Axca wal max yun yalon tu', caytu' max yunej. A yet max aj wan yet max sakbi, max yatz'on el Gedeón tu' yal no tz'um, jun wal sec' aej max el yin no'. ³⁹Max yalon Gedeón junelxa bay Dios: C'amokab chi tit yowal a c'ul win Mamin, yujtol chin awji oc en. Ayto wal junxa yechelej chi wochej chi wojtaknej waloni. A yet junelxa ti', axa sat tx'otx' chi ch'acay el yuj yal ak'bal, axa pax no tz'um xin, junelnej tol takinokab no', xi cham.

⁴⁰Axca wal yalon tu', caytu' max yut Dios yet junxa ak'bal tu'. A yet max sakbi elok, caw wal takin no tz'um tu', axa pax sat tx'otx', caw wal tol ch'acan yuj yal ak'bal.

Yayc'aybal eb madianita

7 ¹Caw wal k'inibalil max aj wan Gedeón, a ton max ak'lay yik Jerobaal, c'al jantak eb anima ayxa oc yetok, max toj eb watx'nej aj is campamento bay a' nuk' aej chi yik Harod. Axa pax is campamento eb madianita xin, a bay satak ec'tok ayajok, bay ac'al yich witz More.

²Max yalon Jehová bay Gedeón: Caw wal xiwil anima ibil oc oj. Ta chi waoc eb madianita yul e k'ab nani', cax chi ayc'ay eb e yuj, chi mi laj e yala' tol a yetok e yipalil che yak' ayc'ay eb. ³Yuj wal tu xin, al xol eb soldado masanil, ta ay eb chi xiw toj yin owal, tol chi pet aj wan eb yecal, chi el eb bay witzal Galaad ti', cax chi meltzoj eb bay yatut, xi Jehová.

Axca tu' max yun yak'on porobal Gedeón eb anima, xan max paxcantok 22,000 eb bay yatut. Asanxanej 10,000 eb max cani. ⁴Palta maxto yal pax Jehová: Xiwilto eb anima ti'. Itok eb nak yuc' aej bay ti a'. A tu' ok wil eb, mactakto txel eb ok can etok, cax ayin ok wala', xi Jehová.

⁵Max lajwi tu', max yiontok Gedeón eb nak max can tu' yuq'uen aej bay ti a'. Max yalon Jehová: Masanil eb tol chi betxajtek aej yul is k'ab yuq'uej, a eb tu' tx'ok chi elcan xol eb tol chi aytok nojan yuq'uen ajtek a', xi Jehová.

⁶A eb tol max betxajtek a' yul is k'ab, cax chi yuq'ueni, 300 eb tol axca tu' max yutej, axa juntzanxa eb xin, max ay nojan eb yuq'uen ajtek a' aej tu'. ⁷Max lajwi tu', max yalon Jehová bay Gedeón: K'okbil eb 300 tu' ok ex colon el wuj, asan eb tu' ok in k'ana', cax ok ayc'ay eb madianita tu'. Axa pax eb tol max ay nojan yuq'uen ajtek a' aej tu', paxokab eb bay yatut, xi Jehová.

⁸Yuj wal tu' xan max yal Gedeón, tol chi meltzojtok eb bay yatut. A yet c'amto chi toj eb bay yatut tu', max yioncan ec' Gedeón is lobej eb, c'al is cacho eb chi xu'. Asanxanej eb 300 max sic'lay can el tu' max can yetok Gedeón. Cax a tu' c'alta' ay is campamento eb bay jolom witz bay yiban bay ay is campamento eb madianita.

⁹A yet jun ak'bal tu' max yal Jehová bay Gedeón: Ajan wanok, cax chach toj ak'on owal yetok eb madianita, yujtol ayin ok waoc eb yul a

k'ab. ¹⁰Ta chach xiw ochon aj eb nak, ayokabtok a chekbej Fura etok bay is campamento eb, ¹¹cax ok ex abxalwok bay ti' mantiado tzet chi yun yalon eb, yuj tu' xan man ok ach xiw a chaon oc owal, xi Jehová.

Caytu' max yut Gedeón. Max toj yetok is chekbej chi yik Fura yet ak'balil tilak is campamento eb madianita, yuj yaben tzet chi yal eb. ¹²A ton eb madianita, yetok eb amalecita, yetokc'al eb max tit bay yetc'ulal bay chi ajol c'u, max saklemcantok eb bay ac'al tu', axca no chapulín. Caw wal c'amxa chi bischaj jantak camello ibil oc yuj eb; lajanxa yilitok axca arena bay ti a' mar. ¹³Cax max jitzontok ba Gedeón bay ti' jun is mantiado eb nak ajc'ul tu', max yaben yalon jun nak soldado is wayich bay junxa.

—Max in wayichnej tol ay jun ixim pan cebada max tit bay sat witz, max ayol bay co campamento ti', max oc chac'naj ixim yin mantiado ti', cax max ec' weknajok, xi nak.

¹⁴Max tak'wi nak yetbi nak tu' axca ti':

—A chi yal elapnok jun tu', a Gedeón is c'ajol Joás aj israel yetok is soldado. A Dios ok on aon oc yul is k'ab yetokc'al co campamento ti', xi nak.

¹⁵A yet max yaben Gedeón tzet max yut yalon eb jun wayichej tu', cax max ay jajan satak Jehová yalon yuj diosalil bay Cham. Max lajwi tu', max toj bay is campamento, max yaloni: Tonek, mayal yaoc Jehová eb madianita yul co k'ab, xi.

¹⁶Lajwi tu', ox makan max yut pojontok eb 300 tu', cax max yak'on junjun is cacho eb yet chi xu eb, c'al junjun moc ayaytok tzeztebalej yul.

¹⁷Max yalon Gedeón tu' bay eb axca ti':

—A yet ok in ec'apnok bay k'axepal ec'tok is campamento eb ajc'ul tu', ok e yil tzet wal ok wunej, caytu' ok e yun pax ayex ti'. ¹⁸A yet ok e yaben in xuon no cacho ti' yetok eb tzunan oc wintak, cax ok e xuon pax e yet e masanil bay yinlak campamento tu', cax ok el e yaw. Ok e yalon axca ti': ¡Yuj Jehová c'al yuj Gedeón! quex chi, xi bay eb.

¹⁹A yet max apni oc Gedeón yetok eb 100 soldado tzunan oc yintak bay k'axepaltok campamento, lanan wal q'uexlen ba eb guardia yin is turno yet chuman ak'bal. A wal yet tu' max xuon eb no cacho, max mak'on poj eb is moc ibil oc yuj. ²⁰Junnejc'al max yun xuon eb is yox makanil is cacho, c'al mak'on poj eb is moc, axa yetok is q'uexan k'ab eb tzezne aj is tzektebal tu'. ¡Jak'ek owal yuj Jehová c'al yuj Gedeón! xi eb. ²¹Max canxac'al can lecan eb soldado israel bay yinlak campamento. Axa eb ajc'ul tu', yanejxac'al eb yeli, chi el yaw eb yuj xiwilal. ²²A yet max xuon eb 300 israel is cacho, axa Jehová max somontok is nabal eb ajc'ul tu', cax ac'al oc eb max yak'lej cam ba. Ay pax eb max eli, max toj eb bay Bet-sita, bay yetc'ulal Zerera, masantac'al max apni oc eb bay mojonan Abel-mehola bay is cawilal Tabat.

²³Lajwi tu', max awtelay eb is tribual Neftalí, c'al Aser, yetokc'al is tribual Manasés, yuj colwaj eb toj yintak eb madianita. ²⁴Cax max yalon Gedeón tol chi tit c'apax eb is tribual Efraín cajan bay siquial tx'otx', chi toj eb yin

aymanil makwal bay ay taxbal bay a' Jordán bay Betábara, a yet c'amto chi apni oc eb ajc'ul tu'. Cax max yiken eb is tribual Efraín tu' toji. ²⁵Max michchaj cawan eb yajaw yuj eb, ay jun chi yik Oreb, axa junxa, chi yik Zeeb. A Oreb tu' max cam bay ch'en ch'en chi yik Oreb tinani'. Axa Zeeb max cam bay jun tec'bal uva, xan a tec'bal uva tu', Zeeb is bi tinani'. Lajwi tu' cax max tzakloj eb tribual Efraín yintak eb madianita tu', cax max yiontok eb is jolom Oreb yetok yet Zeeb bay Gedeón, bay k'axepal ec'tek a' Jordán.

Max michchaj eb cawan rey yuj Gedeón

8 ¹Masanil eb is tribual Efraín, max tit yowal eb yin Gedeón, yujtol maj awtelay eb yuj cham yet max el yich yoc owal yin eb madianita. ²Max tak'wi cham:

—¿Tom max e na xin tol miman tzet max wun e yintak? A tzet max e yun yet-xac'al lajubal ti', caw wal miman yelapnok yintak tzet max jun on yet yichbanil, ³yujtol max yak' Jehová cham Oreb, c'al cham Zeeb is yajawilal eb soldado yul e k'ab. ¿Tom miman wal tzet max wun yintak wal jantak max e yun tu xin? xi cham Gedeón.

A yet max yaben eb yinatil Efraín tzet max yal Gedeón, max sicbi ay yowal c'ul eb. ⁴Max ayapnok Gedeón yetok eb 300 soldado bay ti a' Jordán, caxc'al tol c'unbinakxa eb, palta maxtoc'al tzakloj eb yintak eb ajc'ul tu', masantac'al max k'axpoj ec' eb. ⁵A yet max apni eb bay Sucot, cax max yalon Gedeón bay eb bay tu':

—Chi wal ayex, elokab yin e c'ul, ak'ek janic'ok tzet chi lo' eb nak ajun wetok ti', yujtol caw wal chi c'unbi eb, yujtol uktebil eb reyal eb madianita juj, a ton cham Zeba c'al cham Zalmuna, xi Gedeón.

⁶Cax max tak'wi eb yajawil conob tu' bay axca ti':

—¿Tom mayal pax michchaj cham Zeba, c'al cham Zalmuna tu' e yuj tinani', yuj tu' xan cha chek jak' low eb nak soldado ti'? xi eb.

⁷Max tak'wi Gedeón:

—A yet mayal yaoc Jehová cham Zeba c'al cham Zalmuna tu' yul in k'ab, axa yet chin meltzoy cayti', cax ok in tzilon el e chibejal e yin yetok q'uix ok tit bay takin tx'otx', xi Gedeón.

⁸Max lajwi tu', max apni oc bay Penuel, max k'anon pax lobej eb nak soldado bay tu', axca max yun bay Sucot, ac'ala' axca tu' max yut pax tak'wok ba eb aj Penuel tu' axca eb tu'. ⁹Max yalon pax Gedeón:

—A yet ok in meltzoy yet mayal ayc'ay eb wuj, ok in mak'ay weknaj jun e torre ti', xi.

¹⁰A tu' ayic' Zeba yetok Zalmuna bay Garcor, tzunan 15,000 soldado madianita yintak eb. Asanxanej tu', yujtol 120,000 eb mayal cami. ¹¹A tu' max tzakloj Gedeón yetok eb is soldado yintak eb ajc'ul tu' bay is tilak takin tx'otx' bay sataktok Noba, c'al bay Jogbeha. Max yak'on ayc'ayok, yujtol aytok eb soldado madianita yin c'ayc'ulal. ¹²Axa pax Zeba, yetok Zalmuna maxto wal el eb, palta maxtoc'al tzakloj Gedeón yintak eb,

masantac'al max michchaj eb, cax max saklemtok is soldado eb yuj xiwilal bay Gedeón.

¹³A yet max meltzoy Gedeón yin owal, max ec'tok bay Heres. ¹⁴A tu' max michchaj jun nak ach'ej aj Sucot yuj, max k'anlen el bay nak, tzetac'el is bi eb yajawil conob Sucot, cax max tz'iben nak tu' is bi junjun eb, cax ay 77 eb yin masanil. ¹⁵Max lajwi tu' max toj Gedeón bay Sucot, cax max yalon bay eb anima ay bay tu' axca ti':

—¿Chi mi nachajtek e yuj tzet max yun in e buchoni yuj Zeba, c'al yuj Zalmuna? Ac'ala' ¿chi mi nachajtek e yuj yet maj e yak' jabok lobej eb nak soldado yet caw wal ay wajil eb nak, cax tol c'unbinak eb? Max e yaloni: Tokwal mayal michchaj eb tu' e yuj, quex chi. A tinani' xin, tix eb nak ti', xi Gedeón.

¹⁶Max lajwi tu', max yiontek Gedeón te q'uix max yitek bay takin tx'otx' max tzilon el is chibejal eb yajawil conob Sucot, yetok te'. ¹⁷Lajwi tu', max toj pax bay Penuel, axa mak'on ay weknaj jun torre bay tu', max mak'on cam masanil eb winak ay bay tu'. ¹⁸Max lajwi tu' xin, max k'anlen Gedeón bay Zeba, c'al bay Zalmuna axca ti':

—¿Tzetbil yili eb nak max e mak'cam bay Tabor? xi bay eb.

Cax max tak'wi eb:

—Lajan yili eb nak axca eli ti'. Axca yili eb yajaw, axca tu' yili eb nak, xi eb.

¹⁹A yet max yaben Gedeón axca tu', max aj yaw:

—Wuřtak eb nak max e mak'cam tu', junnej in txutx yetok eb. A tinani' chi waoc Jehová yin testigoal. Matawal maj e mak'cam eb nak wuřtak tu', c'am mi chex in mak'cam tinani', xi Gedeón.

²⁰Lajwi tu', max yalon bay nak Jeter, is babel c'ajol axca ti':

—Ajan wanok, cax cha mak'on cam eb nak ti', xi bay.

Yal ach'ejto nak Jeter tu', xan max xiw nak yion ajtek ch'en espada yuj mak'on cam eb. ²¹Lajwi tu' xin, max yalon Zeba yetok Zalmuna bay Gedeón axca ti':

—¿Tzet yuj xan manak ach chon a mak'camok, yujtol axca wal eli, axca tu' yayji oc epalil? xi eb.

Max aj lemnaj Gedeón, max mak'on cam eb. Max yion el ch'en argolla ayoc yin nuk' is camello eb. ²²Max lajwi tu' xin, max yalon eb yet israelal Gedeón tu' bay:

—Ach max on a colil yul k'ab eb madianita, xan ach, yetokc'al eb enatil chex occan co yajawilok, xi eb.

²³Max tak'wi Gedeón bay eb axca ti':

—Mayinnak, tamwal eb wuninal ok on oc e yajawilok; palta a Jehová co Yajawil yayji. ²⁴Asan jun chin k'an ayex, ta che yak' ch'en yutxiquinej max e yiel yin eb madianita ayin, xi Gedeón.

Ibil oc juntzan ch'en yutxiquinej naba oro yuj eb ajc'ul tu', yujtol axca tu' is beybal eb cajan bay takin tx'otx'. ²⁵Cax yin wal aymanil max

litx'baj ay eb jun an k'ap, max yaon ay eb ch'en yutxiquinej tu' bay yiban an, max yalon eb bay Gedeón axca ti':

—Tix ch'en ti', chi el wal yin co c'ul chi jak'on ayach, xi eb.

²⁶A jantak ch'en oro ayoc yin yutxiquinejal tu', ay 1700 siclos yalil, tx'ok pax yel juntzanxa ch'en watx' yili, c'al adorno yetok an is pichil eb reyal madianita, yetokc'al ch'en collar ibil oc yuj is camello eb. ²⁷A yetok juntzan tzet yetal tu' max watx'nej Gedeón jun pichilej yet sacerdote, cax max cancan yuj bay is conob chi yik Ofra. Axa masanil eb israel max yintaknej el eb Jehová yuj yoc eb ayilal bay jun tu'. A jun tu' max oc yin telc'obalil bay Gedeón yetok yinatil.

²⁸Axa eb madianita max occan eb is chekbejok eb israel, majxac'al je' colon ba eb. Yin cawinak abil, a yet iquisto ec' Gedeón tu', c'amxa owal, junc'ulalxac'al yayji.

Is camichal cham Gedeón

²⁹Max lajwi tu xin, max paxtok Jerobaal bay yatut. ³⁰70 is yuninal max alji, yujtol xiwil ix max yi'. ³¹Ay pax junxa ix ix yuj bay Siquem. Ay jun yune' ix tu' max yil yetok, max yak'on yik Abimelec.

³²Caw wal icham winakxa Gedeón, is c'ajol Joás yet max cami. Max mukay bay ay panteón is mam bay Ofra, bay ay eb is yinatil Abiezer.

³³Axa yet max lajwi cam Gedeón, max yion pax el ba eb israel yintak Jehová axa yak'on eb ayilal bay comon dios Baal tu', cax a' Baal-berit max oc is diosalok eb. ³⁴Max tojcan Jehová is Diosal eb c'ayc'ulal yuj, caxc'al a' max colon eb bay eb ajc'ul oyan oc yinlak eb. ³⁵Tamwal junok tzet yetal watx' max yak' eb paktzilok bay is yinatil Jerobaal, a ton Gedeón, yuj tzet watx' max yun yin eb.

Max oc Abimelec yin yajawil

9 ¹A Abimelec, is c'ajol Jerobaal, max toj bay Siquem k'anjab yetok masanil eb yican is txutx, max yaloni:

²—Yujtol jicanektoc'al co ba, xan chi wal ayex, elokab yin e c'ul, tol che monte eb e yet conob bay Siquem ti', cax che k'anlen bay eb, ta watx' chi yajawbi eb 70 c'ajol Jerobaal tu' e yiban, ma yelxac'al watx' tol junnej winak chi oc e yajawilalok. Naektek tol asannej in ay wuj in ba e yetok, xi nak.

³Yujtol ayto yuj ba yetok eb nak bay tu', yuj tu' xan max yaoc ba eb yin monten eb anima bay Siquem tu', tol a Abimelec tu' chi oc yin yajawil xol eb. ⁴Yetok c'apaxok, max yion ajtek eb 70 siclos ch'en plata yul temploal comon dios Baal-berit, max yak'on eb bay Abimelec. A ch'en tu' max yak' bay juntzan eb isaj winak, yet chi oc eb yetok, cax max toj eb yintak ⁵bay Ofra, bay max ec' Jerobaal is mam. A tu' max mak'cam Abimelec tu' eb nak 70 yuhtak bay yiban jun ch'en ch'en. Asanxanej nak Jotam max colchaji, yujtol max c'ubajcan el ba. A nak tu', tzunan uninxac'al yintak masanil is c'ajol

Jerobaal. ⁶Max lajwi tu xin, axa masanil eb anima bay Siquem, c'al eb ay bay Bet-milo max wajban oc ba bay yich te matx'ji ay bay Siquem tu'. A tu' ay jun ch'en ch'en ya' yili yuj eb, a ton bay tu' max yaoc eb Abimelec yin yajawilal.

⁷A yet max yaben Jotam, tol max oc Abimelec yin yajawilal, cax max ajtok bay jun tzalan yin c'ul witz Gerizim, max awji aytek yin ipejal, yet watx' masanil chi abeni:

E masanil ex cajan bay Siquem, chi cam e yaben tzet chi wala', yet watx' axca tu', ok yab Dios tzet ok e yala'.

⁸A yet junel, max ab yochej te te' tol ay junok yajawil te' chi oqui. Yuj ab wal tu' xan max yal te' bay te olivo, tol chi oc te' is yajawilok te' masanil. ⁹Max ab tak'wi te olivo, max yalon te': C'amak, ta chin oc e yajawilok e masanil, c'amxa chi wak' aceite, chi k'anabax yuj is mimanbilal Dios, c'al yuj eb anima, xi ab te'.

¹⁰Max lajwi tu', max ab yalon te te', ta chi oc te higuera is yajawilok masanil te te'. ¹¹Max ab yalon pax te higuera: C'amak, ta chin oc e yajawilok e masanil, c'am xam chi wak' in sat chi oc vinoal chi ak'on tzalobjbok c'ul eb anima yetok Dios, xi ab te'.

¹²Max ab yalon pax te te' bay an uva, ta chi oc an is yajawilok masanil te te'. ¹³Max ab yalon pax an uva: C'amak, ta chin oc e yajawilok e masanil, chim in bekcan wak'on vino chi ak'on tzalobjbok c'ul Dios, c'al eb anima, xi ab an. ¹⁴Yinx a tzunanil max yal masanil te te' bay te q'uix, tol chi oc is yajawilok. ¹⁵Max ab yalon te', tol chi je' yoc te' yajawilok te te' tu' masanil. Max yaloni: Ta yel yin masanil e c'ul chin e yaoc e yajawilok, ocanek yalan wenel ti' e masanil. Ta c'am pax chi je' e c'ul chin oc pax e yajawilok xin, elokabtok jun miman k'ak'ej win, cax chi tz'acantok te c'ute' bay Líbano, xi ab te'.

¹⁶A tinani' xin, chin k'anlej ayex: ¿Tom yel wal watx' max e yunej, xan max e yaoc nak Abimelec tu' e yajawilok? ¿Tom is moj wal axca tu' che yut is yinatil Jerobaal tu' tinani'? ¹⁷Max ex col-lay el yuj in mam tu' yul is k'ab eb madianita. ¹⁸Axa ayex ti', chex meltzoy oc yin is yinatil in mam tu', max e mak'on cam 70 is c'ajol bay jun ch'en ch'en. ¿Tzet xam wal e yayji xan max e yaoc Abimelec, is yune' jun ix is chekbej in mam tu' e yajawilok, asan mi yujtol ayto e yuj e ba yetok nak yuj is txutx'? ¹⁹Chi walcan ayex tinani': Ta yel yin jichanil yayji oc e yuj yin in mam tol camnakxa, cax che yunen axca tu' yetok is yinatil, watx'okab e yayji yetok nak Abimelec tu', cax watx'okabc'al ok yun yeloc nak e xol. ²⁰Ta c'amak xin, titokab can junok miman bolob yin Abimelec tu', cax chi c'aycan el conob Siquem, yetokc'al Bet-milo; axa bay Siquem c'al bay Bet-milo chi el paxtek junok miman k'ak'ej, yet chi c'aylay el Abimelec, xi Jotam.

²¹Max lajwi yalon Jotam juntzan tu', cax max el bay tu', max tojcan cajan bay Beer, yujtol chi xiw bay Abimelec is yux'tak tu'.

²²Oxeb abil max yak' Abimelec yajawil yiban conob Israel. ²³Max lajwi tu', max yaontok Dios jun ajc'ulal nan xol eb aj Siquem yetok Abimelec, cax max meltzoy

oc eb yin. ²⁴Axca tu' max yun paktzelay bay yuj is camichal eb nak 70 is yuǵtak max mak'camok. Max paktzelay c'apax bay conob Siquem yuj max yaoc ba yetok Abimelec yin is yobtakil tu'. ²⁵A eb aj Siquem tu', ay eb max toj c'ubaj el ba bay tilak be jolomlak witz, cax chi elol lemnaj eb elk'an yin anima chi ec' bay yul be chi ec' bay cawilal conob tu'. Max yaben Abimelec tol axca tu' chi yun eb nak.

²⁶A yet tu xin, max apni oc jun winak chi yik Gaal is c'ajol Ebed yetok eb yican bay Siquem, watx' max yuncan nak yul sat eb anima bay tu'. ²⁷A yet tu', max eltok eb bay yintak eltok conob, yet chi wajon eb an uva, max watx'nen eb vino. Axa chaon eb jun k'in tu', max c'oli low eb, c'al yuc'wi an eb bay yul templo is diosal. A yet tu' caw wal yob max yal eb yin Abimelec. ²⁸Cax max oc ijan Gaal tu' yaloni: ¿Mac winakil Abimelec tu' yaloni? A nak tu', c'ajol Jerobaal nak, a pax Zebul is chekbej yayji ocok. A eb tu' c'am yelapnok eb. A pax a on aj Siquem on ti', ¿tzet animail on? ¿Tom chon ocxac'al is chekbejok eb nak ti'? Yelc'ulalokab chi co naektek tinani', tol a jichmam, a ton Hamor, jun mac max watx'nen aj conob Siquem ti', xan jiek el co ba yul k'ab Abimelec. ²⁹A..., ta ayin e yajawil in, mayal mi in c'ayil Abimelec tu', chim wal bay: Wajbaj oc a soldado cax chi jak'on owal, quin chi mi, ǵi nak.

³⁰A yet max yaben Zebul, is yalcalil Siquem tu' tzet chi yal Gaal tu', caw wal max tit yowal. ³¹Ayman max yatok k'anej bay Abimelec yin ewantakil. Axa yalontok tu': Max jay Gaal, is c'ajol Ebed yetok eb yuǵtak cayti', lanan yak'on eb is c'ul eb anima, cax chi oc eb ajc'ulal en. ³²Yuj tu' titan yet ak'balil yetok a soldado, cax che c'uban el e ba bay tilak conob ti'. ³³Axa yet toxa chi sakbi elok, cax chex oc e yak'on owal yin conob ti', axa yet chi eltok Gaal tu' yak'on owal etok yetok is soldado, okxac'al ela' tzet ok otej, ǵitok Zebul tu'.

³⁴A yuj tu xin xan max toj Abimelec yet ak'balil yetok eb is soldado. Can makan max yut pojontok ba eb, bay yinlak conob Siquem max c'ubaj el ba eb. ³⁵Max eltok Gaal bay puertail is murallail conob, cax max eltek Abimelec yetok eb is soldado bay chi c'ubaj el ba eb tu'. ³⁶A yet max yilon Gaal tu', cax max yalon bay Zebul axca ti':

—Il tonabi, masanil bay satlak witz chi ayol soldado, ǵi Gaal.

—C'amak, yenel witz chal animail tu' ach ti', ǵi Zebul.

³⁷Max yalon pax Gaal:

—Ac'ala' c'apax bay tzalan chi yik is muxuc tx'otx' tx'otx' chi aytek eb, c'al bay beal matx'jilak yet eb naom el k'anej, a tu' chi ayol soldado, ǵi Gaal.

³⁸—Chi cam a k'anjab el tinani', lek'ti ach. Ach max ala' tol c'am yelapnok Abimelec yet chon oc is chekbejok. A tinani', a ton eb is soldado max a buchul, elantok tinani', yet chak' owal yetok, ǵi Zebul.

³⁹Max lajwi tu', max oc Gaal yikban eb anima bay Siquem, max eltok yak'on owal yin Abimelec. ⁴⁰Max toj lemnaj Abimelec yin, max ayc'ay Gaal, yetokc'al eb anima yuj. Palta maxto col ba Gaal, max octok bay puertail conob. Xiwi mac max cam bay puertail conob tu'. ⁴¹Max lajwi tu', max meltzoy Abimelec bay conob Aruma. Axa Zebul max yuktej el Gaal yetok eb yuǵtak bay Siquem yin junelnej.

⁴²Max yaben Abimelec tol chi eltok eb aj Siquem mulnajil yet junxa c'u. ⁴³Yuj tu' xan max pojtok is soldado yin ox makan, max c'ubán el ba eb bay xolak ac'un. A yet max yilon eb tol max elol eb anima bay is puertail conob, max eltek eb soldado bay chi c'ubaj el ba tu', cax max yak'on eb owal yetok eb. ⁴⁴Yet wal jun bek tu', max toj Abimelec yetok jun makan eb soldado makon puertail conob, palta ca makanxa eb xin, max oc eb yak'on owal yetok eb anima max eltok mulnaj yinlak conob Siquem tu'. ⁴⁵Masanil yet jun c'ual tu' ayoc owal yuj Abimelec, masantac'al max ayc'ay jun conob tu' yuj, cax max c'ayon elok, max mak'on cam masanil anima, max secon can ay atz'am yiban jun conob tu'.

⁴⁶A yet max yaben aj eb anima bay nail colbalbail bay Siquem, tzet max yuncantok Siquem yuj Abimelec, max toj eb c'ubán el ba bay yul templo jun yechelej chi yik Baal-berit. ⁴⁷A yet max yaben Abimelec, tol a tu' chi c'ubaj el ba eb anima bay tu', ⁴⁸max toj yetok masanil eb soldado tzunan oc yintak, bay jolom witz Salmón, max yiontok jun echej, cax max tzoc'on el jun is k'ab jun te te', max yaon ajtok jolom is xic', max yalon bay masanil eb anima, tol axca tu' chi yut c'apax eb yin aymanil. ⁴⁹Yuj tu' xan masanil anima max tzoc'on el k'ab te te', max oc tzakan eb yintak Abimelec, masantac'al max apni oc eb bay templo tu', max occan bulan is k'ablak te' tu' yin nail colbalbail tu'. Max yaon oc eb k'ak'al, xan max cam masanil eb anima ay bay tu', cax ay mi junok mil eb winak yetok eb ix ix.

⁵⁰Lajwi tu', max toj Abimelec yak'on owal yin conob Tebes. Ayman max yoy ba yin, cax max ayc'ay yuj. ⁵¹A bay nan yul jun conob tu', a tu' ay jun miman na bay chi col ba eb anima yet ay owal. A tu' max toj eb anima c'ubaj el ba. Caw wal watx' max yun makchen eb is puertail jun na tu', max ajtok eb yiban. ⁵²Max apni oc lemnaj Abimelec, max jitzon oc ba bay puertail na tu', yet chi yaoc k'ak'al yaloni. ⁵³Axa jun ix ix ayic' yiban na tu', max bekon aytek jun ch'en ch'en yet molino, c'uxan wal yin is jolom Abimelec max ayol ch'en, cax max pojtok is jolom. ⁵⁴Ayman max yal bay jun nak yikomal is mitx'k'ab yet owal: Itek espada, cax chin ak'on camok, c'am chi je' in c'ul tol ok al-layok, tol a junok ix ix chin mak'on camok, xi. Yuj tu xin, max yitek nak tu' yespada, max jekontok yul is c'ul, cax max cami. ⁵⁵A yet max yaben eb is soldado tol mayal cam Abimelec, cax max meltzoy eb bay yatut.

⁵⁶Axca tu' max yun paktzen Dios bay Abimelec yuj yobtakil max yun yin is mam, yuj max mak'cam eb nak 70 is yuhtak. ⁵⁷Ac'ala' axca tu' max yun c'apax paktzen Dios yin eb anima bay Siquem yuj is yobtakil eb, cax max elcan apnok is catab k'anej Jotam, is c'ajol Jerobaal yiban eb.

Max yak' cham Tola c'al cham Jair yajawil

10 ¹A yet mayal camtok Abimelec, ay jun winak yin is tribual Isacar chi yik Tola, is c'ajol Fúa, is yitxiquin Dodo. A jun tu' max colwaj yin eb yet israelal. A Tola tu', a tu' max ayji bay Samaria, bay

siquilal tx'otx' tol yet Efraín. 223 abil max yak' yajawilal xol eb israel, masantac'al yet max cami, max mukon eb bay Samir.

³Max lajwi tu' max yak' Jair aj Galaad yajawilal xol eb israel yin 22 abil. ⁴A Jair tu', ay 30 is c'ajol, junjunc'al eb c'ajolej tu', yibanc'al burro chi ec' eb, ay junjun is conob eb bay yul makbej Galaad. A jun 30 conoblak tu', chito binaj tinani': A juntzan conoblak yet Jair, xi.

⁵A yet max cam Jair tu', a tu' max mukay bay Camón.

Chi etax eb israel yuj eb amonita

⁶Max oc pax eb israel yunen yobtakil satak Jehová junelxa, cax max c'oli yoc eb ayilal bay satak juntzan yechel Baal, c'al Astarté, c'al bay is diosal eb ti': eb aj Siria, aj Sidón, aj Moab, aj Amón, c'al yet eb filisteo. Caywal tu' max yun bekoncan eb Jehová Dios, cax majxa oc eb yin ayilal bay. ⁷Yuj wal tu' xan max tit yowal c'ul Jehová yin eb, max alay oc eb yul k'ab eb filisteo, c'al yul k'ab eb amonita; a yet jun abil tu' max ayc'ay eb israel yuj eb. ⁸18 abil max oc eb yul k'ab eb, max oc ijan eb yetnen eb israel cajan bay Galaad bay junxa k'axepal ec'tok a' Jordán, bay is tx'otx'al eb amorreo. ⁹Max k'axpoj ec'tok eb amonita bay a' Jordán yin yak'on eb owal yin eb yinatil Judá c'al yin eb yinatil Benjamín, c'al yin eb yinatil Efraín. Yuj tu' xin, max yilon eb israel tol yelc'ulalxac'al chi etnelay eb. ¹⁰Catawal tu' max k'anon eb colwal Jehová yetok, max yalon eb axca ti': Ach co Diosal, caw wal max oc co mul ayach, max ach co bekcanok, axac'al bay Baal max on oc yin ayilal, xi eb.

¹¹Max yalon Jehová bay eb axca ti': Max ex etax yuj eb aj Egipto, yuj eb amorreo, yuj eb amonita, yuj eb filisteo, ¹²yuj eb sidonio, yuj eb amalecita, c'al yuj eb amonita, axa yet max aj e yaw ayin, max ex in colilok. ¹³Caxc'al mi axca tu' max wutej, palta max in e bekcanok, yuj e yoc ayilal bay juntzanxa dios, yuj tu' xan a tinani', majxa in colwaj e yetok. ¹⁴Asek k'anek colwal juntzan dios ayoc yipok e c'ul tu', aokab chi colwaj e yetok yet ayex oc yin cawxinakil axca ti', xi Cham.

¹⁵Yuj tu' xin, max tak'wi eb israel bay Jehová axca ti': Caw wal yel max oc co mul on ayach, palta tinani', chi je' cha watx'nej tzet chi cha a c'ul jin on, palta asan tol chon a col tinani', xi eb. ¹⁶Max mak'on poj eb jantak is diosal eb tx'ok conobal, yet chi oc pax eb yin ayilal bay Jehová. Yuj tu' xin, maj techaj yuj Jehová, tol toc'al max il-lay oc eb yuj yet lanan yaben eb yailal.

¹⁷Max wajban oc ba eb amonita bay Galaad, axa pax eb israel xin, max wajbaj c'apax oc ba eb bay Mizpa. ¹⁸A eb yajaw yayji oc xol masanil eb israel cajan bay Galaad max yaloni: ¿Mac mi txel junok chon ikban oc yin owal yin eb amonita? A wal jun tu' yajaw ok yuncan co xol bay Galaad ti', xi eb.

Cham Jefté

11 ¹A yet tu', ay jun winak chi yik Jefté. Caw wal watx' yin ak'oj owal yul yet Galaad, yune' jun ajmul ix yetok jun winak chi yik Galaad.

2A pax xal, a caw yistzil cham Galaad tu xin, ay c'apax yune' max yila'. A yet max ch'ibaj eb nak tu', max uktelay el Jefté yuj eb nak bay na tu'. Max yalon eb, tol c'am yalon yet yin satakej, yujtol tx'ok yel is txutx. 3Caytu' max yun yelaj Jefté bay eb yuxtak tu', max tojcan bay yul yet Tob. A bay tu' max waj jun bulan isaj winak. A eb tu' max oc yetok yin yunen mitz'winakil.

4Max ec'c'altok jun tiempoal xin, max oc eb amonita yak'on owal yin eb israel. 5Yuj tu', a eb yajaw bay Galaad max chek eb toj tit Jefté bay yul yet Tob. 6Max yalon eb axca ti' bay:

—Titan cayti', chi yochej co c'ul tol ach chach oc co yajawilok yin ak'oj owal yin eb amonita, xi eb.

7Max tak'wi Jefté axca ti':

—Ayex ti' max e yak' yobc'ulalil win, max e yak'xac'al pural quin e yukten el bay yatut in mam, xan tzet yuj xan chex jayoc quin ul e sayon ec' yet ayex oc yin e cawxinakil? xi Jefté.

8—A ton yuj ayon oc yin cawxinakil ti', xan chon jayoc ach ul jila'. Tutun wal chi jochej chach toj jetok, ach wal ok ak' owal yetok eb amonita, cax ach chach oc co yajawilok co masanil on cajan on bay Galaad ti', xi eb bay.

9Tatol che yochej ayex ti' chin meltzoji, cax chi wak'len owal yetok eb amonita, cax ta ok oc Jehová wetok yet ok ayc'ay eb wuj, zok mi wal in oc e yajawilok chi yal tu'? xi Jefté bay eb.

10Axa eb yajaw tu' max alonxac'al axca ti' bay:

—A Jehová ayoc testigoal jin, tol ok jun axca chal tu', xi eb.

11Catatu' max toj Jefté yetok eb, max yaon oc eb is yajawilalok. A bay Mizpa max cayic'nej Jefté yalon junelxa satak Jehová tzet yetal maxax yal bay eb chekbej tu'. 12Lajwi tu', max chekontok Jefté juntzan eb chekbej bay cham reyal Amón, yet chi k'anlej eb bay axca ti': tzet yuj xan aytek yowal e c'ul jin, xan chex jayoc e yak' owal jin? xitok cham. 13Max paktzen cham reyal eb amonita bay eb is chekbej cham Jefté axca ti': A yet max ex el ayex israel ex ti' bay Egipto, max e yiec' co tx'otx', max tojtac'al bay a' aej Arnón, masantac'al max apni oc bay a' Jaboc c'al bay a' Jordán. A tinani xin, ak'ek meltzoj tx'otx' ayon yin watx'c'ulalil, xi cham.

14Lajwi tu' max chekontok cham Jefté juntzanxa eb chekbej bay is reyal eb tu', 15yet chi toj yalon pax eb axca ti': Caywal ti' max yun paktzen cham Jefté axca ti': Ayon israel on ti', c'am e tx'otx' max jiec'ok, tamwal bay eb moabita, tamwal ayex amonita ex ti'. 16A yet max on eltek bay Egipto, a bay takin tx'otx' max on titc'al, masantac'al max yal co jayoc bay a' Cakyin Mar, max on apni oc bay Cades.

17Max co chekontok juntzan eb co chekbej bay reyal Edom, tol chon is cha ec'tok bay yul is tx'otx', palta yel wal maj yal c'ul eb max on ec'tok. Ac'ala' max jalon c'apax bay reyal Moab tol chon is cha ec'tok bay yul is tx'otx', palta maj yal c'apax c'ul. Yuj tu' xan max on canc'al bay Cades. 18Lajwi tu xin, max on ec'c'al bay takin tx'otx', max bet joyonc'al co ba bay yinlak is tx'otx'al eb Edom, c'al yinlak yet eb Moab, masantac'al max yal japni oc bay yichcanil Moab. Max on ayji ec'

bay tu' bay junxa k'axepaltok a' Arnón. Palta maj on k'axpoj ec'ok, yujtol a bay tu' chi chail yich is tx'otx'al eb Moab. ¹⁹Xan max jatok co chekbej bay Sehón, is reyal eb amorreo, bay yul yet Hesbón, max jalon c'apax bay tol chon is cha ec'tok bay yul is tx'otx'al, cax chon apni oc bay co tx'otx'al on, con chitok bay. ²⁰Palta maj cha yab Sehón tu', maj cha yabej, maj on is chaic'tok bay yul is tx'otx'. Axa max yunej, tol max wajbaj oc masanil is soldado, max toj watx'nen aj is campamento bay Jahasa, max oc ijan yak'on owal jin. ²¹Palta axa Jehová co Diosal ayon israel on ti', max bekon oc eb yul co k'ab, xan max ayc'ay eb juj. Caytu' max yun jioncan is tx'otx' eb amorreo bay jun lugar tu'. ²²Max jican masanil is tx'otx'al eb amorreo chi tojtac'al bay a' Arnón, masantac'al chi apni oc bay a' Jaboc. Chi toj c'apax bay takin tx'otx', masantac'al bay a' Jordán. ²³Axa tinani', ¿tom chi yochej e c'ul che tok' pax ec' tx'otx' tx'otx' eb amorreo max yican ec' Jehová, max yak'on ayon? ²⁴Ta a Quemós e diosal chi ak'on janic'ok tzet yetal ayex e sataknej, a jun tu' che yaloc e yetok, ¿man mi yelok axca tu'? Cayton c'apax tu', a tzet max yak' Jehová co Diosal ayon, a ton chi jaloc jetok. ²⁵¿Tom cha na' tol yelxac'al watx' ach yintak Balac, is c'ajol Zipor, reyal Moab? Tokwal max yak' owal jetok yuj jun tx'otx' ti'. ²⁶Ayxa 300 abil co cajay on bay Hesbón, bay Aroer, c'al yetok bay juntzan aldealak cawilal tu', yetokc'al masanil juntzan conoblak ay bay is tilak a' Arnón. ¿Tzet yuj xan ato tinani' che yak' yowalil ayon yuj jun tx'otx' tu'? ²⁷Ayin ti', c'am junok tzet yetal yob chi wun ayach. Palta ach ti', yob tzet chonej, chach jayoc ul ak'on owal jin. Palta xin, a Jehová juez yayji jiban on, a ok on beyc'ulnen el ayon israel on ti', c'al ayex ti', xitok cham Jefté.

²⁸Caxc'al mi axca tu' yoqui, palta maj cha' yab eb tzet max yaltok cham Jefté.

Max yak' cham Jefté is ti'

²⁹Catatu xin, max oc Yespíritu Jehová yin cham Jefté, caytu' max yun yec' bay yul yet Galaad, c'al bay yul yet Manasés, max ec' c'apax bay Mizpa yul yet Galaad tu', max toj yak'on owal yin eb amonita. ³⁰Max yak' cham Jefté is ti' bay Jehová: Tatol ok ak' eb amonita yul co k'ab, ³¹ayin ok wak' tz'a yin xajanbalil ayach, mactxel babel ok eltek in ul chaon bay watut, yet ok in meltzoj yin owal ti', xi cham.

³²Max toj Jefté yin eb amonita, cax max ayc'ay eb yuj, yuj colwal Jehová. ³³Xiwil eb ajc'ul tu' max cam yuj cham Jefté, 20 conob max yak' ayc'ay cham Jefté bay nan xol Aroer, bay Minit, c'al bay Abel-keramim. Caywal tu' max yun yayc'ay eb amonita yuj eb israel.

³⁴Axa yet max meltzoj cham Jefté bay yatut bay Mizpa xin, a ix jun c'otan is cutz'in cham, max eltek ul chaoni, cax chi canalwi ix, lanan txijon pandereta yet max eltek. Asannej ix, c'am junok is c'ajol cham. ³⁵A wal yet max eltek ix tu', cax max tzilontok cham is pichil yuj tx'oxon elok tol ay is cusc'ulal, max yaloni:

—¡Ay... ach in cutz'in! ¡Caw wal ya' chi wab oj! Ach wal max etek jun yailal ti' wiban, yujtol max wak' in ti' bay Jehová, xan a tinani', yowalil ok wikej bay max wak' in ti' tu', xi cham.

³⁶Max tak'wi ix bay:

—Mam, yunokab win bay max ak' a ti' bay Jehová, yak'ban tol mayal ayc'ay eb amonita yuj Cham. ³⁷Asan xin, chin k'an ayach, tol chak' cabokxa xajaw ayin yet chin toj ec'jab yetok eb ix wet k'opojal bay jolomlak witz, yet chin ok' yetok eb, yujtol yowalil ok in cam yet c'amto chin nupayi, xi ix.

³⁸Max yak' cham Jefté cab xajawxa tu bay ix. A yet jun tiempoal tu', max toj ix bay jolomlak witz yetok eb ix tu', max ok' ix, yujtol ok cam ix yet manto nupayok. ³⁹Max lajwi cab xajaw tu xin, axa meltzoj ix bay ayic' is mam tu'; max yak'on cham Jefté yun bay max yak' is ti' bay Jehová, caytu' max yun cam ix cutz'in cham Jefté yin tol c'amtoc'al junok winak max yilej. ⁴⁰Yuj tu' max oxcac'al is beybalok eb israel, tol junjunc'al abil chi wajon ba eb ix k'opoj yok'i yin caneb c'ual, yuj nalaytek ix cutz'in cham Jefté.

Cham Jefté c'al tribual Efraín

12 ¹Max wajban oc ba masanil eb winak yin yet is tribual Efraín, max k'axponen eb a' Jordán bay yetc'ulal tok Zafón, max yalon eb bay cham Jefté axca ti':

—¿Tzet yuj xan max ach toj ak' owal yin eb amonita yin tol maj al jabej, yet chon toj etok? A tinani' ok ach co nil tz'a yul atut ti', xi eb.

²Max yalon cham Jefté bay eb:

—Ayin ti', yetok eb in conob, ay jun miman owal co xol yetok eb amonita, max ex wawtej ayex ti', palta maj ex jayoc colwaj jetok. ³Tutun max wil xin tol majc'al ex colwaj jetok, xan max wak'xac'al in k'inal yin owal tu', max in oc wak'on owal yetok eb amonita, axa yuj colwal Jehová xin, xan max ayc'ay eb wuj, xan ¿tzet yuj chex jayoc ul e yak'on owal win tinani'? xi cham.

⁴Xan max wajbaj oc cham Jefté masanil eb anima cajan bay Galaad, max yak'on eb owal yetok eb yet Efraín, max ayc'ay eb yinatil Efraín yuj eb. A eb yet Efraín tu', max buchwaj eb yin yaloni, tol a eb aj Galaad, elnak xol eb Efraín tu', c'al xol eb Manasés, tol toc'al max beklaycan eb yet Efraín tu' yuj eb. ⁵A eb aj Galaad tu', max oc eb makwal bay taxbal bay a' Jordán, xan ta ay junok eb yet Efraín tu' max toj elajok, cax max yochej max k'axpoji, max k'anlen eb aj Galaad ta yet Efraín. C'amak, ta xi jun mac max elaj tu', ⁶cax max yalon eb bay, tol chi yal jun belan k'anej ti', Xibolet. Ta yet Efraín chi yala' Sibolet, xi, yujtol c'am chi je' wal yalon yin watx', caytu' chi yun mitx'onxac'al eb, cax chi mak'onxac'al cam eb bay taxbal bay a' Jordán tu'. A yet tu' 42,000 wal eb winak yin is tribual Efraín max cami.

⁷A yet tu' wakeb abil max oc cham Jefté yajawilal xol eb israel. A yet max cam xin, a tu' max mukay bay junok conob yul yet Galaad.

Oxwanxa eb yajawil israel

⁸A yintak Jefté max oc Ibzán aj Belén yajawilalok eb israel. ⁹A jun tu', ay 30 is c'ajol, c'al 30 is cutz'in. Max oc yichamil eb is cutz'in tu' xol eb

c'amxa yuj ba yetok, ac'ala' c'apax eb c'ajolej, max yi' eb yistzil bay xol eb c'amxa yuj ba yetok. A Ibzán tu', ukeb abil max yak' yajawilal xol eb israel. ¹⁰A yet max cam xin, a tu' max mukay bay Belén.

¹¹Max lajwi tu xin, axa Elón yin is tribual Zabulón, a max yak' yajawilal yin lajoneb abil xol eb israel. ¹²Axa yet max cami, max mukay bay Ajalón, bay tx'otx'al is tribual tu'.

¹³Max lajwi tu', axa Abdón, is c'ajol Hilel aj Piratón max yak' yajawilal xol eb israel, ¹⁴waxakeb abil max yak' yajawilal. Ay 40 is c'ajol yetok 30 is yitxiquin, junjunc'al juntzan tu' max aj eb yiban no burro. ¹⁵A yet max cam xin, max mukay bay Piratón, a ton tu ay bay yul tx'otx' makbej yul yet Efraín bay siquilal tx'otx' yul yet eb amalec.

Is yaljubal Sansón

13 ¹Max oc pax is mul eb israel yul sat Jehová, yuj tu' xan max alay oc eb yul is k'ab eb filisteo yin cawinak abil yuj Cham.

²A bay conob Zora, yin is tribual Dan ay jun winak chi yik Manoa. C'amc'alta' yune' yetbi max yila'. ³Max tx'ox ba Cham yángel Jehová bay xal, max yaloni: Ach ti' wal yel c'amc'alta' junok one' chela'. Palta tinani', ok ach oc yobixal, cax ok elon yin jun winak unin. ⁴A yet ok beytok ti', c'amc'al vino choq'uej, tamwal junok tzet yetal tol ow choq'uej, tamwal cha lo c'apax tzet ay yowalil, atac'ala' yalon ley. ⁵A yet ok jay jun one' tu', man ok tzuklay el xil jolom, yujtol nazareo ok yunej, yujtol yet Dios yayji yet c'amto chi alji; tol a ok chaon el yich colon el conob Israel bay yul is k'ab eb filisteo, xi Cham ángel tu'.

⁶Cax max toj xal tu' bay ayic' is yichamil, max yaloni: Ay jun is chekbej Dios max jayoc bay ayin ec'ok, caw wal max c'ayaj in c'ul yuj, axca wal tol yángel Dios max wila'. Maj in k'anlej bay mactxel, tamwal max yal ayin mactxel. ⁷Asan tol max yal ayin, toláb ok jay junok wune', max yaloni toláb manxa ok wuc' vino, c'al junokxa uq'ueja' tol ow, c'al junok tzet ay yowalil co looni, atac'ala' yalon ley; axa ab jun unin tu', yet Dios yayji yet ok aljok, masantac'al yet ok camok, xi xal.

⁸Max yalon Manoa yin is txaj bay Jehová: Chi wal ayach Mamin, elok wal yin a c'ul tol cha chektek a chekbej tu' ayon junelxa, yet watx' ok yal ayon, tzet wal ok jun yetok jun yaliñ unin ok aljok tu', xi.

⁹Cax max yaben Dios is txaj Manoa tu', max tx'oxon pax ba jun ángel tu' bay xal yetbi junelxa bay xol mulnajil, palta c'amic' Manoa bay tu'.

¹⁰Ayman max toj lemnaj xal yalon bay:

—Sebach, yujtol max tx'ox pax ba jun chekbej max ul k'anjab ayin yet junel, xi xal.

¹¹Cax max tit lemnaj Manoa, max toj yetok yetbi tu', max yaloni:

—¿Tom ach ti' max ach ul k'anjab bay wetbi ti' yet junel? xi bay. Max tak'wi jun chekbej tu' bay axca ti':

—Ja', ayin toni, xi.

¹²Cax max k'anlen Manoa tu' bay:

—A yet ok yunen tzet max al tu', ġtzet wal ok jun yetok, c'al jilon ch'ib jun unin tu' on? ħi Manoa.

¹³Max tak'wi Cham yáŋgel Jehová:

—Chi yikej etbi tu' tzet yetal max wala': ¹⁴C'am chi yuc' ix vino, c'al junokxa tzet yetal tol ow, c'am chi yuq'uej. Cax c'am chi lo' ix sat an uva, tamwal tzet yetal tol ay yowalil lolayi, a ton juntzan tu' max wal bay ix tol chi yikej, ħi jun áŋgel tu'.

¹⁵⁻¹⁶A Manoa tu', man yojtakok tatol a Cham yáŋgel Jehová jun tu', xan max yala':

—Chi wal ayach, elokab yin a c'ul chon echbanej, ti' chi toj ji' jun no yune' chiwo a chi', ħi bay.

Max tak'wi jun áŋgel tu':

—Caxc'al chin can e yetok, palta maj in low e yetok; chi je' e yak'on no' tu' yin xajanbalil bay Jehová, ħi.

¹⁷Max lajwi tu', max yalon Manoa tu' bay axca ti':

—Alcan a bi ayon, yet watx' chi je' jalon yuj diosal ayach yet chi yunen el tzet max ul alcan ayon ti', ħi Manoa.

¹⁸Max tak'wi Cham áŋgel tu' bay:

—ġTzet chi oc che k'anlej in bi? A jun tu' caw c'ayubtak yoqui, ħi Cham áŋgel tu'.

¹⁹Cax max yiontek Manoa tu' no chiwo, c'al junxa ofrenda yin ixim trigo yin bak'ejal. Cax max yak'on tz'a xajanbal bay Jehová bay yiban jun ch'en ch'en. Max lajwi tu', max tx'oxon Jehová junok milagro satak Manoa yetok yetbi. ²⁰Yet max aj culnaj k'ak' yiban altar tu', axa yoc Cham áŋgel tu' xol xak k'ak'ej, max pax ajok. A yet max yilon eb axca tu', max ay jajnaj eb, axa yay nojan eb sat tx'otx' tu'. ²¹Catatu' max nachaj el yuj Manoa tol a Cham yáŋgel Jehová jun chekbej tu'. Majxac'al tx'ox ba junelokxa bay Manoa yetok bay yetbi. ²²Cax max yalon cham bay yetbi tu' axca ti':

—A tinani' t'inan ok on camok, yujtol max jil wal yin Dios, ħi bay yetbi. ²³Cax max tak'wi xal bay axca ti':

—Tatol ay is nabal Jehová tol chon cam yuj, maj mi cha' co xajanbal max jak' bay, c'al jofrenda, cax maj mi tx'ox juntzan ti' jila', cax maj mi yal juntzan ti' ayon, ħi xal.

²⁴A yet max apni c'ual yalji yune' xal xin, max yak'on yik Sansón. Axa yet max ch'ibaj nak unin tu xin, max yak' Dios watx'c'ulalil yiban. ²⁵Max chaon el yich tx'oxon ba Yespíritu Jehová yin nak yet ayic' bay is campamento eb yinatil Dan, bay nan xol Zora yetok Estaol.

Max oc yetbi Sansón

14 ¹A yet junel, max ayapnok Sansón bay yul jun conob eb filisteo chi yik Timnat, cax max oc sat yin jun ix k'opoj bay tu'. ²A yet max meltzoy bay yatut max yalon bay is mam c'al bay is txutx axca ti':

—Ay jun ix k'opoj max wil bay Timnat xol eb filisteo, max can in nabal yin, xan chi wal ayex tol chi toj e k'an jun ix k'opoj tu' wi', ħi nak.

³Cax max tak'wi is mam, c'al is txutx nak, max yalon eb axca ti':

—¿Tzet yuj xan a bay xol eb filisteo ok tok a say etbi, tol tx'ok conobal eb?

¿Tom c'amxa junok ix watx' xol eb jet conob ti'? Xi is mam c'al is txutx tu' bay.

Max tak'wi Sansón axca ti':

—A wal jun ix tu' chi wochej. A ix chi toj e k'an wi', xi nak.

⁴Caw wal man yojtakok is mam c'al is txutx tzet is nabal Jehová, yujtol lanan naon Cham tzet ok yun yel yich junok owal yetok eb filisteo yujtol a eb chi yajawbi yiban israel yet tu'. ⁵Xan max toj Sansón yetok is mam c'al is txutx bay conob Timnat. A yet max ec'tok eb bay jun makan an uva awbil yuj eb aj Timnat, max eltek jun no ach'ej coj yin Sansón, chi awji no' yet max tit no' yin. ⁶Yet wal jun bek tu', max oc Yespíritu Jehová yin nak yuj yak'on yipalil, c'am jabok tzet yetal ibil oc yuj, yetok wal is k'ab max coc' tzilnentok jun coj tu', axca chi yun co coc' bijnentok junok no yune' chiwo. Maj yal bay is mam c'al is txutx tzet max yun tu'. ⁷Max lajwi tu', cax max apni oc eb bay conob tu', max k'anjab nak yetok ix k'opoj tu', cax max canxac'al is nabal nak yin ix.

⁸Axa yet max ec'tok jayeb c'ual, yet lanan toj Sansón yet ok nupay yetok ix filistea tu', cax max ec' bay max mak'cam no coj tu'. Axa yet max apni oc nak, max yiloni, ayxa octok jun no cab yul joyomteal is bakil no', caw wal nojnak el yul tu' yuj is yalcabil no'. ⁹Max lajwi tu', max yion eltek nak no', max looni, axa toj tu'. Axa yet max tzakloj yintak is mam c'al is txutx tu', max yak'on nak no' lo eb, c'amc'al tzet max yala' tatol a bay yul joyomteal yul is bakil no coj max bet yieltek nak no' yal cab tu'.

¹⁰Max lajwi tu', max apni eb bay yatut ix k'opoj tu', max chaon Sansón k'in'al is nupayil, axca ta is beybal eb nak ach'ej bay jun lugar tu'. ¹¹A yet max yilon eb nak filisteo, tol max apni oc Sansón, max yawtentek eb 30 eb ach'ej yet chi ilwi k'in'al nupayil tu'. ¹²Cax max yalon nak Sansón bay eb nak ach'ej tu' axca ti':

—Ay junok tzet ok wal ayex: Ta a yet ukeb c'ual k'in ti', ok e yal tzet yelapnok jun tzet ok wal tu', ok wak' jun junok e k'ap e k'utilok junjun ex, tol lino caw wal watx', c'al jun junok mojan e pichil yet k'in. ¹³Ta man ok nachaj el e yuj xin, ayex ok e yak' jun junok an k'ap tu' ayin yetok jun junok mojan in pichil yet k'in, xi nak bay eb. Cax max tak'wi eb bay axca ti':

—Alto wal jab xin, tzet yetal chochej chal tu', xi eb nak.

¹⁴Max yalon nak axca ti':

A yin junok chiwajwom, a tu' max eltek tzet chi uc'layi.

A yin jun caw wal ay yip, a tu' max eltek tzet yetal caw wal chi', xi.

Axa yet is yox c'ual k'in tu', c'amc'al chi je' paktzen eb nak. ¹⁵Yuj wal tu xin, axa yet is can c'ual, max yalon eb nak bay yetbi Sansón tu' axca ti':

—Montej wal el bay echamil tu' tzet chi yal elapnok jun tzet max yal nak ayon ti', chi lajwi tu' cax chalon ayon. Ta c'amak, chach co nil tz'a yetok a mam, a txutx, c'al masanil mac ayic' yul atut tu'. Axca wal tol toc'al chon e yitek cayti', cax chon e yaon oc yin majilal, xi eb nak.

¹⁶Max lajwi tu', max ok' ix, cax max toj yalon bay Sansón:

—Chin a yaj ach ti', cax c'am chin ochej. Max al jun a k'anej, yet chi nail eb nak wet conob, cax c'am wal jabok chal ayin, tzet chi yal elapnok, xi ix bay. Max tak'wi bay ix axca ti':

—C'amtax mi chi wal bay in mam c'al bay in txutx, ¿tom ato ayach ok wala'? xi nak.

¹⁷Cax max occ'al ijan ix yok' bay nak yin juntzan ukeb c'ual k'in tu', cax ayc'al oc ix yalon bay junjun c'u. Axa yet is suk c'ual, max yalon nak bay ix. Max lajwi c'al yaben ix max yalon bay eb is yet conob tu' tzet chi yal elapnok.

¹⁸Axa yet is k'ekbintakil yet is suk c'ual tu', max bet yalon eb bay Sansón:

C'am junokxa tzet yetal yelxac'al chi' yintak no yalcab.

C'am junokxa yelxac'al ay yip yintak no coj, xi eb nak.

Max tak'wi nak Sansón axca ti':

Asan yujtol a wetbi tu' max e yaoc e yetok, xan max nachaj e yalon tzet chi yal elapnok, xi nak.

¹⁹Max lajwi tu xin, max oc pax Yespíritu Jehová yin Sansón yuj yak'on yipal, cax max toj bay conob Ascalón, max bet mak'on cam 30 eb nak filisteo bay tu'. A is pichil eb nak ayocok, a' max yielok, max yak'on tojolok tzet max yal tu'. Max lajwi tu', max meltzoy bay yatut is mam, yujtol caw wal chi chichon c'ul. ²⁰Axa yetbi tu xin, max ak'lay ix bay jun nak ajun yetok Sansón tu', yet max nupay yetok ix.

15 ¹Axa yet ayxataxc'al tu' yet lanan wal yoc jooj trigo, max toj Sansón yilon ix yetbi tu' yaloni, ibil oc jun no yaliñ chiwo yuj. Axa yet max apni, max yalon axca ti':

—Chi wochej chin octok wil ix wetbi bay yul cuarto, xi nak.

Majxa chalay octok nak yuj is ni' tu'. ²Asan tol max yal bay nak axca ti':

—A in naoni tol manxa ok ochej ix, xan max wak' ix bay jun nak amigo; palta ay wal junxa is nuej ix caw wal tx'ijan yintak ix etbi tu', chi je' a' ix che' etbiok, xi cham niej tu'.

³Max tak'wi Sansón bay cham:

—A tinani xin, c'am chi oc in mulok yuj tzet yetal ok wut eb et conob ti' yuj in pakon in ba, xi Sansón.

⁴Max toj nak xin, cax max bet mitx'ontek 300 no wax, max c'alón oc junjun yuchan taj yin is ne catakc'on no wax tu'. ⁵Max lajwi tu', max yaon oc nak is k'ak'al te', axa bekontok nak no' tu' xol ixim trigo eb filisteo tu'. Masanil ixim jobilxa aj bulanok, c'al ixim ayto oc yin yakan max tz'atok; max lajwi c'apax el an uva, c'al te olivo. ⁶Max oc ijan eb filisteo k'anlen ec'ok, mactxel max uten axca tu', cax max al-lay bay eb, tol a Sansón max uteni, yujtol max chichon is c'ul yuj tzet max utlay yuj is ni' aj Timnat, tol max ilay ec' yistzil, cax max ak'lay bay jun is yamigo, xan max jayoc eb filisteo ul nilon tz'a ix ix tu' yetok is mam. ⁷Max lajwi tu', max yalon nak Sansón axca ti':

—Yujtol axca ti' max e yunej, xan manc'al ok in oc wanaj ex wetneni, masantac'al tol ok wican ec' in pak ayex, xi nak.

⁸Max tit wal numnaj max yila', xan xiwil anima max mak'can camok, cax max toj cajay ec' bay ch'en nach'en bay Etam.

A Sansón yetok bakil yalan ti' no burro

⁹Axa yet max yilontek eb israel xin, tol ayxa ec' eb filisteo yul yet Judá cax mayal watx'nej eb is campamento bay yac'alil Lehi, ¹⁰cax max k'anlen eb israel ay bay Judá tu' bay eb:

—¿Tzet yuj xan chex jay e yak' owal jetok on? xi eb. Max tak'wi eb filisteo:

—Tol chi ul co mitx' nak Sansón, cax chi jaon oc yailal yin yujtol miman is mul max yaoc ayon tu', xi eb.

¹¹A yet max yaben eb yinatil Judá jun tu', 3,000 eb max toj ilon nak Sansón bay ch'en nach'en ay bay Etam, cax max yalon eb bay:

—¿Tom man ojtakok tol ayon oc yul k'ab eb filisteo ti'? ¿Tzet yuj xan chaoc yobal co xol yetok eb nak? xi eb.

Max tak'wi Sansón:

—C'am junokxa tzet max wunej, asan tol max wican ec' in pak yuj tzet max quin yut eb, xi nak.

¹²Max yalon eb bay nak axca ti':

—Yuj tu' xan tol chach ul co c'altok cax chach toj jak'on bay eb nak tu', xi eb.

Max tak'wi Sansón:

—Ak'ek e ti' ayin xin tatol yel c'am chin e mak'cam ayex ti', xi bay eb.

¹³Max tak'wi eb bay axca ti':

—C'amak, c'amc'al chach co mak'camok, asan toc'al chach co c'altok, cax chach toj jak'on bay eb nak filisteo tu', xi eb.

Max lajwi tu', axa c'alon eb yetok cab tx'an lasu caw wal ac' tu', max yion eltek eb bay yul nach'en tu'.

¹⁴A yet max apni eb bay Lehi, max tit eb filisteo chawal, toxc'a chi awji eb yuj tzalojc'ulal. Ayman max oc pax Yespíritu Jehová yin Sansón yuj yak'on yipal, max nic'ontok tx'an lasu axca tz'ayil k'apej. ¹⁵Yin aymanil max yiaj jun bakil yalan ti' burro yaxtakto yoqui. A yetok jun tu' max mak' cam 1,000 eb nak filisteo. ¹⁶Max lajwi tu' max yaloni:

Asan ch'an jun bakil yalan ti' burro max wak'balnej cax max aj cab oxeb bulan camnak wuj,

Yujc'al ch'an jun bakil yalan ti' burro, jun mil eb winak max in mak' camok. xi.

¹⁷Max lajwi tu', max bekon ay jun bakil ti' no burro tu'. Yuj tu xin, a jun lugar tu', Ramat-lehi max yikcanok, (chi yal elapnok tzalan bakil yalan ti' no no'). ¹⁸Caw wal max tak is ti' Sansón, yuj tu' xan max yawtej Jehová yetok, max yalon bay: ¿Tzet max yun ak'on wip yet max ayc'ay eb

nak tu' wuj, chi lajwi tu', cax chin a chaon cam yuj takintial yul is k'ab juntzan tx'ok conobal ti'? ãi Sansón.

¹⁹Max lajwi tu xin, max jakon Jehová jun uc'bala' bay Lehi tu', max yuq'uen Sansón a' aej chi ajal tu', caw wal max oc yip max yabej. Yuj tu xin, a jun a' yaliã aej tu', masantac'al tinani' En-hacore yoc is bi. (Chi yal elapnok yuc'bala' mac chi aj yaw).

²⁰Junc'al abil max oc Sansón yajawilalok eb israel, yak'ban ayoc eb yul k'ab eb filisteo.

Max bet Sansón bay Gaza

16 ¹Axa yet jun c'ual, max betic' Sansón bay Gaza. A bay tu' max yil jun ix ajmul ix, max octok yul yatut ix ix tu', cax max can way yetok ix yet jun ak'bal tu'. ²A yet max yaben aj eb aj lugar tu', tol a tu' ayic' bay tu', cax max yoyon ba eb yinlak na tu', max taynen eb is puertail conob yet jun ak'bal tu'. Cax tz'inc'al ãi eb max makon eb masanil ak'bal, max naon eb tol a yet k'inibalil yet junxa c'ual, cax ok mak'on cam eb yaloni. ³Asanc'al max yechbanej yoc chuman ak'bal, cax max aj wanok, max toj bay puertail conob, axa yocon eltek jun miman puerta tu', yetokc'al is marcoal, max jolomxic'neni, max toj yak'oncan tac'al bay jolom witz satak Hebrón.

Sansón yetok ix Dalila

⁴Max lajwi tu', max yaon oc is nabal yin jun ix ix chi yik Dalila, cajan bay jun jobe chi yik Sorec. ⁵Yuj wal tu xin, max toj eb yajawil conob filisteo k'anjab yetok ix Dalila tu', max yalon eb axca ti':

—Cha monte j wal Sansón tu', cax cha k'anlen el bay, baytal chi ca tit oc is yipalil, c'al tzet wal chi yun jak'on ayc'ayok, cax chi co c'albani, yet watx' c'amxa tzet chi yut ba. Chi jak' 1,100 siclos plata ayach junjun on, ãi eb bay ix ix tu'.

⁶Max lajwi tu' cax max yalon ix bay Sansón axca ti':

—Chin tewi ayach, tol chal ayin bay chi tit oc jun epal caw wal tx'ok yel ti', çay mi wal tzet chi yun a c'al-layi, cax c'amxa chi je' a xuyon el a ba? ãi ix bay.

⁷Max tak'wi Sansón bay ix axca ti':

—Ta chin c'al-lay yuj ukebok tx'an tx'an tol c'amto wal chi cam taki, chi el wipalil ti', axcacac'al yip comon winak chi wuncanok, ãi bay ix.

⁸Yuj tu xin, xan max yitok eb filisteo ukeb tx'an tx'an tol c'amto wal chi cam taki bay ix Dalila, xan max c'al-lay Sansón yuj ix. ⁹Ay juntzan eb winak mayaltax max c'ubaj el ba bay yul yatut ix, xan max wek'il ix yaw yin ipejal:

—¡Sansón, chi jay eb nak filisteo ach mak'on camok! ãi ix.

Yet wal jun bek tu', max nic'ontok juntzan tx'an tu' axcac'al nic'laytok junok tx'al tol tz'ayilxa, axcac'al tu' max yutej. Majc'al nachaj el yuj eb filisteo bay chi ca tit oc is yipalil. ¹⁰Max yalon ix Dalila bay Sansón:

—E..., caw wal yob ach, max quin etnej, max ak' lek'tial ayin. A tinani!, chin k'an tewi ayach. Al ayin tzet wal chi yun jeon a c'al-layi, xi ix.

¹¹Max tak'wi Sansón axca ti':

—Ta chin c'al-lay yetok ac' lasu cax chi elcan wipalil, axcacac'al yipal comon winak chi wuncanok, xi bay ix.

¹²Yuj wal tu', xan max say ix Dalila juntzan tx'an ac' lasu, cax max c'alon ay yetok tx'an. Max el pax yaw ix junelxa:

—¡Sansón, chi jay eb filisteo ach mak'on camok! xi ix.

Ac'ala' yet junelxa tu' ayxa eb nak max c'ubaj el ba yul is cuarto ix. C'am jabok yelapnok bay, axcac'al chi yun nic'laytok an tx'al, cayc'al tu' max yut tx'an lasu tu'. ¹³Max yalon pax ix Dalila bay axca ti':

—Cac'al ti' quin etneni, cax chak'onc'al lek'tial ayin. Al wal el ayin tzet wal chi yun ach co c'albani, xi ix. Max tak'wi Sansón:

—Ta cha chemtok yukeb makanil xil in jolom ti' yetok an tx'al tol chi chemlayi, cax cha caw t'ininak chot yetok te chembal, caytu' chi yun yelcan wip, cax axcacac'al yipal eb comon winak chi wuncanok, xi Sansón.

Cax max ak'lay way Sansón yuj ix. Axa yet mayal wayaj tu xin, max chemontok ix is xil yetok an tx'al chi chemlayi. ¹⁴A yet max yak'on cawbok ay yetok te chembal tu', cax max awji ix:

—¡Sansón, chi jayoc eb filisteo ach mak'on camok! xi ix.

Max aj jucnaj Sansón, max yocon aj te chembal yetok an tx'al tu'. ¹⁵Yuj tu xan max yal ix axca ti' bay:

—Ach ti', caw wal lek'ti ach, tzet yuj xan chala' tol chin ochej, yinxaxoxelal chin etnej ti', caw wal c'amc'al chal ayin baytal chi ca tit oc jun miman epalil tu'? xi ix.

¹⁶Max occ'al ijan ix k'anlen el bay, baytal chi ca tit oc yipalil, max caktzaj aj c'ul c'al tewi oc ix yin, yuj tu' xan max caktzajxac'al ajok.

¹⁷Cax max yalon ajok, baytal chi ca titoc is yipalil:

—C'amtoc'al junelok chi tzuklay el in xil yecheltax c'al max in alji, yujtol a yet c'amto chin alji, max in sic'laycan el yuj Dios, yet chin oc nazareook, chi yal elapnok tol yetc'alta' Dios wayji ocok. Yuj tu' ta ay mac chi tzukon el in xil ti', cax chi elcan wipalil, axcacac'al comon winak chi wuncanok, xi.

¹⁸Cax max nachaj el yuj ix, tol a yet junelxa ti', yel chi yal Sansón. Cax max yaontok ix k'anej bay eb yajawil conob filisteo:

—A tinani!, titanek wal yet junelxa ti', mayal yal Sansón ayin bay chi titoc is yipalil, xi ix.

Yuj tu xin, max apni oc eb nak yilon ix yetok ch'en tumin.

¹⁹Cax max yak'on way ix Dalila tu' Sansón bay sat is xub, max yawten ix jun nak tzukom xilej, max tzukon el nak ukeb makanil is xil. Max lajwi tu' max oc ijan ix tx'emoni, yujtol mayal pax yip. ²⁰Cax max awji ix axca ti':

—¡Sansón, chi jayoc eb filisteo ach mak'on camok! xi ix.

Max el is wayan Sansón xin, a mi wal naoni, tol okto je' colon ba axcac'al chi yun yet yalantok. Man yojtakok tatol mayal beklaycan yuj Jehová.

²¹Max lajwi tu xin, max apni oc eb filisteo, max c'alban eb, cax max yion eltek eb is bak' sat, cax max yiontok eb bay conob Gaza. A tu' max yaoc eb cadena yin, max makchen octok eb preso, max yaon oc eb mulnajil yin molino bay yul preso tu'. ²²Palta max ch'ib pax xil is jolom junelxa.

Is camichal Sansón

²³Cax max wajban oc ba eb yajawil conob filisteo yin tzalojc'ulal, yujtol max michchaj Sansón yuj eb, max yak'on eb is xajanbal bay is dios chi yik Dagón, cax chi c'oli bitni eb bay axca ti':

A co dios ti' max ak'on jun jajc'ul Sansón ti' yul co k'ab, xi eb.

²⁴Ac'ala' c'apax eb anima, a yet max yilon oc eb Sansón tu', max bitnen eb is diosal:

A co dios max aon oc jun jajc'ul ti' yul co k'ab, jun mac max nilon tz'a jawoj, cax xiwil eb jet conob max mak' camok, xi eb.

²⁵Caw wal max tzaløj eb anima tu', max k'anontek eb Sansón tu', yet chi oc yelawok eb, max yion eltek eb yul preso, max yaon octok eb nan xol yoyal templo yuj yetnen eb. ²⁶Max yalon Sansón bay jun nak ach'ej inej ocok:

—Iintok bay yin yoyal nan yul templo ti', cax chin oc k'ean jabok yin, xi.

²⁷Masanil eb yajawil conob, wajan ec' eb bay yul templo tu', caw wal nojnak yuj anima, winak c'al ix, ay mi 3,000 anima ayajtok bay yet is cab piso, watx'xac'al matz'li eb yin tzet chi utlay Sansón. ²⁸Lajwi tu', max yalon Sansón bay Jehová: Chin k'an ayach Mamin Jehová, tol chin a natek, asanxanej junelxa ti', cax chak'on wip yet chin paktzej bay eb filisteo ti', yuj in bak' sat max yieltek eb nak, xi Sansón. ²⁹Max oc lacan yin cab mimek yoyal templo tu' bay nan yul, juntzan iknej aj yalil jun templo tu', ³⁰max el yaw: ¡Caxc'al chin cami, asan tol chi cam eb filisteo ti' wetok! xi Sansón.

Max lajwi tu' max yak'on yip tenon ec' cab mimek yoyal templo tu', axa tit weknaj yiban masanil eb yajawil conob tu', c'al yiban masanil anima ayic' bay tu'. Yelxac'al miman anima max cam yuj Sansón yet max camxac'al ti', yintak eb max mak'camc'al yet yalantok yet bekan yayji.

³¹A yet max lajwi yunen jun tu xin, cax max apni oc eb yuřtak, c'al eb ayto yuj ba yetok, max bet yiontek eb is mimanil, max mukon eb bay nan xol Zora yetok Estaol bay ay is panteón cham Manoa is mam. Junc'al abil max oc Sansón yajawilok conob Israel.

Jun templo yet Micaía

17 ¹A bay siquikal tx'otx' yet Efraín, a tu' max caway ec' jun winak chi yik Micaía. ²A jun tu' max yal bay is txutx:

—A yet max elk'anelay ch'en 1,100 siclos plata, max alil catab k'anej yiban jun elk'om tu'. Max wab wal alon juntzan k'anej tu'. Ilabi, a' ayin ayic' ch'en, ayin max welk'anej ch'en ayach, xi bay.

Yuj tu' xan max yal is txutx tu' bay:

—¡Aokab Jehová chi yak' watx'c'ulal eban, ach wune'! xi xal.

³A yet max yak'on meltzoj nak ch'en bay is txutx tu', max yalon xal:

—Ach wune', a jun tumin tu', a tinani' chi wak' ch'en bay Jehová, yet chi watx'ji junok yechelej tol chi joslayi, yetokc'al junok chi watx'nelay yul molde, xan ayin chi wak' meltzoj ch'en ayach, xi xal.

⁴Max yak' meltzoj Micaía ch'en plata tu' bay is txutx. Axa yak'on xal 200 siclos ch'en plata bay jun watx'nem plata, yet chi watx'nelay juntzan yechelej tu'. Lajwi tu', max alay octok bay yul yatut Micaía.

⁵Caytu' max yun yoc yatut Micaía yin yatutok comon dios. Max watx'nej nak junok chaleco yet sacerdote yetok juntzanxa yechelej, max yaon c'apax oc junok eb is c'ajol tu' yin sacerdoteal. ⁶Yujtol a yet jun tiempoal tu', c'am is reyal eb israel, junjunc'al chi el yunen tzet chi yochej c'ul.

⁷A bay conob Belén yul yet Judá, a tu' cajan jun ach'ej levita, ec'jabwome'al yayji yul makbej Judá. ⁸A jun ach'ej tu', max eltok bay yul yet Belén tu', yet chi toj say bay chi toj cajayok, max ec'c'al bay siquial tx'otx' yul yet Efraín, cax max apni oc bay yatut Micaía.

⁹—¿Baytal cajan ach? xi Micaía tu' bay. Max yaloni:

—A bay Belén yul yet Judá max in tita. Ayin ti' levita in, lanan in sayon ec' bay ok in cajayok, xi.

¹⁰—Tatol axca tu', canan can wetok, yet watx' chach oc in sacerdoteok, axca wal in mam ok onej. Ok wak' lajoneb siclo plata a tojol yin junjun abil, cax ok wak'on c'apax a pichil c'al a lobej, xi Micaía bay jun ach'ej tu'.

¹¹Max chaon c'ul jun levita tu' cancan cajan yetok Micaía, axca wal is c'ajol max yutej. ¹²Max yaon oc Micaía jun levita tu' is sacerdoteok, cax caytu' max yun cancan cajan bay tu'. ¹³Xan max na Micaía tol ok cha yaxilal bay Dios, yujtol levita wal jun ayoc is sacerdoteok.

Micaía yetok eb yet is tribual Dan

18 ¹A yet jun tiempoal tu', c'amc'al reyal eb israel ayocok. Axa is tribual Dan, c'amto junok makan tx'otx' max ak'l'ay bay, lananto yec' eb sayon bay ok cajayok. ²Yuj tu' xan a eb yet Dan tu', atac'al bay Zora, c'al bay Estaol max chektok eb owan is soldado tol caw wal tec'an waayi, yet chi toj eb sayoj tx'otx' bay chi cajayi. A eb owan tu', max ec'tok eb bay siquial tx'otx' yul yet Efraín, max apni oc eb bay yatut Micaía. A bay tu' max can eb jun ak'bal. ³A yet lananxa yapni oc eb bay cawilal yatut Micaía tu' max yaben eb yoc yul nuk' jun ach'ej levita tu', max toj eb k'anlen bay, max yalon eb:

—¿Mactxel max ach iontek cayti'? ¿Tzet yuj xan ayach ec' cayti'? ¿Tzet chi ul onej? xi eb bay.

⁴Max yalon jun levita tu' bay eb, yuj is trato max watx'nej yetok Micaía, yuj yoc sacerdoteok Micaía tu'. ⁵Max lajwi tu xin, max yalon eb bay:

—K'anlej bay Dios juj on xin, tatol watx' ok yun yeloc jun co viaje on ti', ñi eb bay.

⁶Max yalon jun sacerdote levita tu' bay eb axca ti':

—Asek yin junc'ulalil, a Jehová ok ex taynen bay ok ex ec'c'al, ñi bay eb.

⁷Xan max tojcan eb owan ilom tx'otx' tu' bay Lais. A eb anima bay jun conob tu' caw wal c'am tzet chi na eb, axcac'al is beybal eb sidonio. A eb tu', ayic' eb yin tzalojc'ulal c'al junc'ulalil, c'amc'al janic'ok tzet yetal chi majax aj bay eb, caw wal najat ay conob Sidón, c'amc'al mac ay yalon yet yin eb, yetc'al ba eb tx'oklil. ⁸Lajwi tu', max meltzoy eb ilom tx'otx' tu' bay Zora c'al bay Estaol, a ton bay aycan ec' juntzanxa yetbi eb, max k'anlen eb bay eb axca ti':

—¿Tzet max yun e viaje? ñi eb. Max tak'wi eb ilom tx'otx' tu':

⁹—Max ec' jil masanil jun makan tx'otx' tu', max jila' tol caw wal watx' tx'otx'. Tonek, jak'ek ayc'ay eb, c'amc'al mactxel toc'al chi cancan chotan cayti' yin tol c'am tzet chi yunej. Tonek jiek ec' jun tx'otx' tu'. ¹⁰A eb anima bay tu' ayic' eb yin junc'ulalil, caw wal lean tx'otx', c'am tzet chi yak' falta bay tu'. A Dios ok ak'on tx'otx' tu' ayon, ñi eb.

¹¹600 eb winak yin is tribual Dan max el bay Zora c'al bay Estaol. Caw wal ay is mitx'k'ab eb yin owal masanil. ¹²Max apni oc eb bay Judá. A bay tu' max watx'nej aj eb is campamento bay yetc'ulal yayubc'ual Quiriat-jearim, a ton bay jun lugar chi yik is campamento Dan tinani'. ¹³Max el pax eb bay tu', max tojcan eb bay siquial tx'otx' yul yet Efraín. Max apni oc eb bay yatut Micaía.

¹⁴Xan a eb owan max bet iloj tx'otx' bay Lais, max yal eb bay eb is yetbi tu':

—Tokwal e yojtak jun tzet yetal tinani'. A bay yul junok na ti', ay jun chaleco, yet juntzan comon yechelej, c'al jun yechelej tol josbil, c'al jun watx'nebil yul molde, xan tzetbil wal ok e yun yetok che na', ñi eb.

¹⁵Xan max toj eb ilom tx'otx' tu' bay yatut jun ach'ej levita tu', a ton bay yatut Micaía. Max apni oc eb yak'on cawil c'ul, ¹⁶yak'ban a eb 600 soldado yet Dan tu', chi yechbanej eb bay ti' puerta, cax ibil oc is mitx'k'ab eb yet owal. ¹⁷A eb owan ilom tx'otx' tu' max octok yin babelal bay yul na tu', max yion eltek eb jun yechelej tol josbil tu', yetok jun chaleco, c'al juntzanxa comon yechelej, yetokc'al jun yechelej watx'nebil yul molde, yak'ban ayic' jun sacerdote tu' yetok eb 600 soldado tu' bay puerta.

¹⁸A yet max yilon jun sacerdote tu' tol max octok eb tu' yul na Micaía, yuj yion eltek eb juntzan tzet yetal tu', max yaloni:

—¿Tzet yetal che yunej? ñi bay eb.

¹⁹Max yalon eb bay:

—Tz'inc'al cachi ach ti', asan tol chach toj jetok; chi jochej ach chach oc co sacerdoteok, axca co mam chonej. ¿Tok mi wal man watx'ok chabej tol chach oc sacerdoteok junok tribual israel, yintak pax tol asan yin familia junok winak? ñi eb.

²⁰A jun nabalej tu' max cha c'ul jun sacerdote tu', max yiontok jun yechelej tu', yetok jun chaleco, c'al juntzanxa diosal Micaía, axa tojcan yetok eb is tribual Dan tu'. ²¹Lajwi tu xin, max chekon babjok eb eb ix ix, yetok eb unin, c'al yetok is jobbejal no', c'al is tzet yetal eb, tzunanxa max yun toj eb soldado, axa toj eb tu'. ²²Caw wal najat-xa chi toj eb, catatu' max wajban oc ba Micaía yetok eb cajan is cawilal, cax max tzakloj eb yintak eb. ²³A yet max yaben eb Danita tu' yel yaw eb tzakan oc yintak eb tu', max meltzotjek t'anan eb yet Dan tu', max k'anlen eb bay Micaía:

—¿Tzet chach on yetok juntzan anima tu'? ãi eb.

²⁴Max tak'wi Micaía bay eb:

—Ayex ti' max e yitek in diosal max in watx'nej, max e yion paxtek in sacerdote, cax c'amxac'al janic'ok tzet max e yak'can ayin, cax chito wal e tec'ban e ba e k'anlen ayin yuj tzet chin oni, ãi bay eb.

²⁵Max yalon eb yet Dan tu' bay:

—C'am chi yochej co c'ul tol chi aj can a nuk' awji jin, axa talaj chi yunej, chi lajwi aj is mimanc'ulal junok eb ayic' co xol ti' cax chach yak'on lajwok eb yetok a familia, ãi eb.

²⁶Max tojc'al can eb yet Dan bay chi toj tu', axa max yilon Micaía tol ec'ban yip eb yintak, xan max meltzotjek bay yatut. ²⁷Max yitok eb yet Dan masanil is tzet yetal Micaía max watx'nej tu', yetokc'al jun is sacerdote, masantac'al max apni oc eb bay Lais. A masanil eb anima ay bay tu' ayic' eb yin tzalojc'ulal c'al yin junc'ulalil, xan yin subojal max ak'lay cam masanil eb tu' yuj is tribual Dan; max yak'on c'apax tz'a eb masanil is conobal eb tu'. ²⁸Yujtol a jun conob tu' najatta ayil bay Sidón, c'am junok mactxel ay yalon yet yin eb, xan c'amxa mactxel max colon el eb. A tu' ay jun conob tu' bay yul jobe yet Bet-rehob. Max lajwi tu', axa eb yet Dan max ca watx'nen aj jun conob tu', axa cajay ec' eb bay tu'. ²⁹A yet yalantok Lais yoc bi jun conob tu', axa tinani' xin, max yak' eb yik Dan, yuj yak'on binaj eb bi yichmam, a ton Dan c'ajol Israel. ³⁰A bay tu' max watx'nej ay eb jun yechelej tol josbil, ibil oc yuj eb tu' yet chi oc eb ayilal bay. A is sacerdote eb, a ton Jonatán yinatil Gersón, is c'ajol cham Moisés. A eb yinatil Jonatán tu' max occ'al is sacerdoteok eb yet is tribual Dan, masantac'al yet max tojcan eb yin presoal. ³¹A jun yechelej max watx'nej Micaía, a' max occ'al diosalok eb yin masanil tiempo yet ayic' is cajlobal Dios bay Silo.

Jun levita yetok yistzil

19 ¹A yet juntzan c'ual tol c'am rey bay israel, ay jun levita cajan bay lugar najat ayil bay siquial tx'otx' yul yet Efraín, max yi' jun ix aj Belén yul yet Judá. ²Palta max yaoc jun ix tu' mul yul k'ab nak tu', xan max toj cajay bay Belén tu' bay ayic' is mam. A yet mayal lajwi caneb xajaw yayji ec' bay tu', ³max toj jun levita tu' monten ix junelxa, talaj chi tit pax ix yetok. Max yitok jun is chekbej yetok cac'on no burro, cax max chaon apnok ix bay yatut is mam tu'. ⁴Ac'ala' c'apax cham mamej tu', max cha' c'apax apnok yin tzalojc'ulalil,

max yaloni tol chi cancan nak yetok bay tu', xan max cancan jun levita yetok is chekbej tu' oxeb c'ual bay na is mam ix ix tu'. Max low eb, c'al yuq'uena' eb, c'al way eb bay tu'. ⁵Axa yet is can c'ual xin, max aj wan yet k'inibalil, axa toj eb tu' yaloni. Axa yet toxa wal chi toj eb, max yalon is mam ix ix tu' bay is ni' tu':

—Ok ach lowok, catatu' ok ach tok, yet watx' ay ep ok ach beyok, xi cham.

⁶Xan max ay chotan eb lowi c'al yuq'uena' eb, max oc tean cham mam ix ix tu' yin eb tol chi can eb junokxa ak'bal yin tzalojc'ulal. ⁷Caxc'al max aj wan jun levita tu' yet chi yochejxac'al chi toji, palta max oxcac'al tean is ni' tu' yin, xan maxto cani.

⁸Axa yet is so c'ual xin, max aj wan jun levita yet k'inibalil yet chi paxi, palta max oc pax tean cham is mam ix ix tu' yin junelxa yet chi lowi, catatu' chi toji, yet watx' ay yip yet chi toj yulak be. Max low eb xin, yak'ban chi ajc'al can c'u. ⁹Axa yet max aj wan jun levita tu' toj yetok ix ix tu' yetokc'al is chekbej, max yalon pax is ni' tu' bay tol mayal ec' c'u xan max oc pax tean yin yet chi can pax can yet junxa ak'bal tu' yin tzalojc'ulal, axa yet junxa c'ual xin, k'inib chi toj eb. ¹⁰Palta pax jun levita tu' xin, majxa yal c'ul max can yet junxa ak'bal tu', palta max tojxac'al yetok ix ix tu' c'al yetok is chekbej, c'al yetok no' cac'on burro ayoc is tz'um. A yet max apni eb satak Jebús, a ton conob Jerusalén, cax toxa chi ay c'u, ¹¹max yalon jun chekbej tu' bay jun levita tu':

—¿Tzet mi wal xi a c'ul ach ti', ta chon can yet jun ak'bal ti' bay conob Jebús ti'? xi nak.

¹²Max yalon jun levita tu' axca ti':

—C'amak, c'am chon tojcan way bay junok conob tol man israelok. Chon tojc'al masantac'al chon apni oc bay Gabaa. ¹³A bay Gabaa tu' ok ec' ak'bal juj, ma bay Ramá xin, xi cham.

¹⁴Cax max tojc'al eb xin. Lananxa k'ekbi max apni oc eb bay Gabaa, a ton jun conob tu' yet is tribual Benjamín. ¹⁵Max elcan eb yul be, max tojcan eb bay Gabaa. A bay tu' ok ec' ak'bal yuj eb. Max toj ay chotan eb bay txonbal bay jun conob tu', yujtol c'am mac chi ak'on posada eb.

¹⁶Max lajwi tu' xin, mayal aj ak'bal max ec'tok jun icham winak petoj bay is mulnajil. A jun icham winak tu', aj siquial tx'otx' yet Efraín yet yalantok. Axa tinani', a tu' cajan ec' bay Gabaa tu', axcac'al ec'jabwom yayji xol eb yinatil Benjamín. ¹⁷A yet max yilon oc cham icham winak tu' jun levita tu', max k'anlen bay axca ti':

—¿Baytal max ach tita, c'al baytal chach toji? xi bay.

¹⁸Max tak'wi jun levita tu' axca ti':

—Toc'al chon ec'tok cayti', a tu' petoj on bay Belén, a tu' chon toj bay junok lugar najat bay siquial tx'otx' yul yet Efraín. Ata bay tu' cajan in. Max in ayji ec' jayeb c'ual bay Belén, axa tinani' xin, chin tojcan bay cajlobal Jehová, palta c'am junok mactxel chi ak'on in posada cayti'. ¹⁹Ay zacate no' in burro ti', ay c'apax co lobej on, yetok ix wetbi ti' yetok in chekbej ti'. C'am tzet chi jochej, xi nak.

²⁰Max tak'wi cham icham winak tu' bay nak:

—Titan wetok, ayin ok wak' masanil tzet yetal ok oc oj, maj yal in c'ul ok ach can bay txonbal ti' yet ak'balil, xi cham.

²¹Xan max yitok cham bay yatut, max yak'on cham lobej no burro.

Lajwi tu', max tx'ajon eb yakan, cax max low eb, c'al yuq'uena' eb.

²²Yak'ban chi tzaloj eb, max jayoc oynaj juntzan mitz'winak aj conob yinlak te na tu', cax max c'oli janlabi octok eb bay puerta, max yalon eb bay cham icham winak tu':

—Ieltek jun winak ayic' ulail ayach tu', chi jochej chi jetnej, xi eb.

²³Max yalon cham aj na tu':

—C'amak ex wet animail, manchak e na e yak'on yobc'ulalil tu' yin jun winak ayic' posadail ayin ti'. ²⁴Ilabi tix jun ix in cutz'in caw wal k'opoj ti', yetok c'apax jun ix ix ibil oc yuj jun winak ti'. A eb ix ti' chi je' waon eltok ayex, yet che yun e yochwan tu' yin eb, palta jun winak ti' c'amokab che yun yobtakil tu' yin, xi cham.

²⁵Palta maj wal cha yab eb tzet max yal cham icham winak tu'. Axa yukten eltok jun levita tu' ix yistzil tu' bay yul calle, cax max etnenlay ix eb masanil ak'bal masantac'al max yal k'inibi ajok, catatu' max bekoncan eb.

²⁶Lananxa sakbi, max meltzox octek ix ix tu' bay yatut cham icham winak bay ayic' yichamil tu', axa yet max jayoc ix bay puerta max ayc'ay ix, cax max camxac'al. ²⁷Axa yet max aj wan jun levita tu' yet k'inibalil, max jakon puertail te na yet chi chaon pax be toji; max yiloni, jaban ay ix yistzil tu' bay ti na, cax jaban can octok is k'ab bay yiban marcoal ti na tu'. ²⁸Max yalon bay ix:

—Ajan wanok, ton, xi bay ix.

Palta majxa tak'wok ix bay, max yion aj is mimanil ix tu', max yaon ajtok yiban jun no burro, max yiontok bay yatut. ²⁹A yet max apni oc bay yatut tu' max coc' c'upnentok is mimanil ix yistzil tu' bay chi nublej ba bakil, lajcaweb bijan max yutej, cax max yaontok bay masanil yul is makbej eb yet israelal. ³⁰A masanil eb max ilon jun tu' max aloni:

—Yettaxc'al max on eltek bay Egipto c'amtoc'al bay maxax jil junok axca jun ti'. Yowalil wal chi cam co naonek yin jun ti' tzet watx' ok junek yetok, xi eb.

Max oc owal yin tribual Benjamín

20 ¹Yuj tu' xan max wajbaj oc ba masanil eb israel satak Jehová bay Mizpa, max titac'al eb Dan bay norte, max tit c'apax eb bay Beerseba bay sur, ac'ala' max tit c'apax eb bay Galaad bay yichcan. ²Cax masanil eb yajaw yayji oc yin junjun tribual israel ayic' eb bay tu'. A xol masanil eb conob Dios wajan ec' tu' ay 400,000 eb soldado watx'xa yayji oc is yespada yul is k'ab. ³Axa pax eb yet is tribual Benjamín xin, max yab eb tol mayal wajbaj ba juntzanxa tribual eb israel bay Mizpa. Max k'anlej eb yajawil eb israel bay jun levita tu' tzet wal max yun yoc jun camich tu'. ⁴Axa yalon nak yichamil ix camom tu':

—Max in apni oc yetok ix wetbi bay conob Gabaa, yul yet Benjamín, yet max ec' jun ak'bal wuj bay tu'. ⁵Palta a yet jun ak'bal tu' max waj ba eb winak cajan bay jun conob tu' yinlak te na bay ay in posada, yet chin is mak'cam eb yaloni, cay wal tu' max yun yoc ijan eb yetnen ix wetbi ti', masantac'al max yal cam ix yuj eb. ⁶Yuj tu' xan max wiaj jun mimanilej tu', cax max in coc' c'upnentok, max waontok bay masanil yul co makbej, yet watx' che yil e masanil tzet max yun yoc jun miman mulej caw wal yobxac'al ti'. ⁷Axa tinani' tutun wet israelal ex xin, ayex ok e na'; ok e yala' tzet ok yun jun ti', ñi nak.

⁸Axca wal tol junxanej max yut ba eb masanil, max yalon eb axca ti':

—C'am junok on chon meltzojtok bay co mantiado bay cajan on masantac'al chi yal ba tzet ok yun jun ti'. ⁹Asan jun tzet yetal yowalil chi junej, tol chi jaoc suerte co xol yet watx' ok jila' mac on txel chon oc yin jak'on owal yin conob Gabaa. ¹⁰Jun yin lajonwan winak yin junjun tribu, a eb tu' chi occan yiban sayon co lobej ayon soldado on ti'. Axa co masanil xin, chon toj jion ec' pak bay eb aj Gabaa yuj jun yobtakil max yun eb tu', ñi eb.

¹¹Junxanej max yut ba eb israel tu' yet max oc eb yak'on owal yin jun conob tu'. ¹²Max yaontok eb chekbej bay masanil yul is makbej Benjamín, max ec' eb yalon axca ti': Yelxac'al wal yob tzet max e yun jaywanok ex ayex ti'. ¹³A tinani', a juntzan winak max yun yobtakil e xol tu', iek eltek eb juntzan winak aj Gabaa ayon cax chi co mak'on cam eb, caytu' ok yun yel jun yobtakil tu' co xol ayon israel on ti', ñi eb. Palta maj cha yab eb yinatil Benjamín tu'.

¹⁴A ti' yet eb, tol max waj ba eb bay Gabaa, max toj eb yak'on owal yin juntzanxa eb yet israelal eb tu'. ¹⁵Ay 26,000 eb soldado max tit xol conoblak is tribual Benjamín, watx'xa yayji yet chi toj yin owal, tx'ok pax yel 700 eb soldado caw wal jelan, cax aj Gabaa eb. ¹⁶A xol masanil eb soldado tu' ay 700 eb tol q'uexan k'ab chi mulnaji, a yetok q'uexan k'ab eb tu' chi k'okwaj yetok jurjubej. A masanil eb tu' caxc'al a junok xilej chi k'ok eb, c'am junok eb tol c'am chi michchaj jun xilej tu' yuj. ¹⁷Axa pax juntzanxa eb israel tu', ay 400,000 eb soldado caw wal k'ajan yin owal, cax c'am oc eb Benjamín xol.

¹⁸Max toj eb israel tu' bay Betel, yet chi k'anlej eb bay Dios mac tribual chi babji yoc yak'on owal yin eb yet is tribual Benjamín. Max yalon Jehová, tol a Judá chi babji yoc yin owal. ¹⁹Max aj wan eb israel tu' yet k'inibalil, cax max bet watx'nen aj eb is campamento bay satak conob Gabaa. ²⁰Max toj eb yin eb Benjamín, max watx'nen oc ba eb satak conob Gabaa yin owal. ²¹Palta a eb yet Benjamín tu' max eltek eb yul conob Gabaa tu'. A yet jun c'ual tu' 22,000 eb yet israelal eb tu', max mak'camok. ²²⁻²⁴Xan max bet oc eb israel tu' yin cusc'ulal satak Jehová masanil c'u, masantac'al yet max k'ekbi ayok, catatu' max k'anlen eb bay Jehová: ¿chon mi toj jak' owal yin eb jet israelal yinatil Benjamín junelxa? ñi eb. Max yalon Jehová: Asek, ñi Cham. Xan max

yion pax eb yip, axa yet junxa c'ual max toj eb yak'on owal yin is tribual Benjamín, cax ac'ala' bay max oc eb yet babelal, a bay tu' max oc eb junelxa. ²⁵Ac'ala' yet junelxa ti' max el paxtek eb yet Benjamín yak'on owal yin eb, max mak'on cam eb junxa 18,000 eb soldado yet israelal eb. ²⁶Yuj tu', max toj pax masanil eb soldado, c'al yetok masanil eb conob bay Betel, max oc pax eb yin cusc'ulal bay satak Jehová. Masanil c'u, c'am jabok loj chi yun eb, max yak'on tz'a' eb xajanbal c'al yak'on eb xajanbal yet junc'ulalil.

²⁷⁻²⁸A yet jun tiempoal tu', a te cañail trato Jehová, a tu' ayic' bay Betel. A Finees, is c'ajol Eleazar, is yitxiquin cham Aarón a ayoc yin sacerdoteal. Max k'anlen eb israel tu' bay Jehová, tatol chi je' yoc pax eb junelxa yin yak'on owal yin eb yet Benjamín, ma tol chi bexac'al ay ba eb axca tu'. Max yalon Jehová bay eb: Ocanek yin eb, a yet yecal ayin ok wak' ayc'ay eb, xi Jehová.

²⁹Xan max toj juntzan eb soldado yet israel c'uban el ba bay yinlak conob Gabaa. ³⁰Axa juntzanxa eb soldado yet israel max toj eb yin eb soldado yet Benjamín, max watx'nen oc ba eb yin yak'on owal yetok conob Gabaa, axca max yun eb yet ewi, c'al yet cabji. ³¹Max el paxtek eb yet Benjamín bay yul conobal tu' yin owal junelxa, max beyc'al tit eb najat yin yak'on owal yin eb yet israelal eb tu', maxto wal cam junxa 30 eb israel yuj eb bay yul beal Betel, c'al yul beal Gabaa, c'al bay c'amxa mac cajan. ³²A wal naon eb tol lanan yelaj eb yet israelal eb tu' bay, axa yayc'ay eb tu', axca max yun eb yet ewi c'al yet cabji, palta toc'al chi elaj eb bay eb ajc'ul tu' janic'ok, yak'ban chi titc'al eb yulak be najat bay tiel conob. ³³Yinxac'al aymanil max watx'nen pax oc ba eb yet israelal eb yin yak'on owal bay cawilal Baal-tamar. Cax max el c'apaxtek eb max c'ubaj el ba bay yinlak conob Gabaa. ³⁴Xan max oxcac'al eb yin conob Gabaa, 10,000 eb sic'bil el xol masanil soldado yet israel max oc yin conob tu' yak'on owal, yelc'ulal max aj can owal. A eb Benjamín max toj najat tu', c'am chi na eb tatol mayal jayok yiban eb.

³⁵A Jehová max ak'on yak' ayc'ay eb israel tu' eb yet Benjamín. A yet jun c'ual tu', max cam 25,100 soldado yet is tribual Benjamín. ³⁶Catatu' max yilontek ba eb yet Benjamín tol mayal ayc'ay eb.

A eb soldado israel tu', maxax el eb najat satak eb yet Benjamín, yujtol yipc'ulej yayji eb winak max c'ubaj can el ba yinlak conob Gabaa, yuj yak'on lajwok conob tu'. ³⁷Yinxac'al aymanil max oc eb mak'on cam masanil anima bay tu'. ³⁸A eb max c'ubaj can el ba tu', lajti' yayji eb yetok juntzanxa eb soldado tol yetbi eb, tol a yet ok ayc'ay conob tu' yuj eb, cax ok yak'on tz'a' eb conob tu' yet chi txecloj mubal, yet watx' chi nachaj el yuj eb tu' tol mayal ayc'ay conob. ³⁹A wal yet tu', a eb israel lanan yel bay eb yet Benjamín, max yilon eb jun miman mub tu', xan max meltzoj eb, max tec'ban ba eb satak eb yet is tribual Benjamín.

Mayal cam 30 eb yuj eb yet Benjamín, xan max na eb yet Benjamín tu' tol lanan yayc'ay eb yuj eb, axca max yun eb yet babelal. ⁴⁰Palta a wal yet jun bek tu' max aj bululok mub bay conob tu'. A yet max yilon eb yet Benjamín tu' yintak, bululixac'al yaj mubal conob tu' satcan. ⁴¹Caywal

tu' max yun tec'ban ba eb israel satak eb yet Benjamín tu', xan max xiwaj eb yet Benjamín yuj tzet yetal mayal tit yiban eb. ⁴²Yuj tu' max elaj eb satak eb israel tu', max tojcan eb bay chi tojcan beal tz'inan tx'otx', palta c'amxa chi je' yel eb. Yujtol max mitx'lay eb cax max mak'lay cam eb yuj eb israel chi eltek bay yul conob. ⁴³Max oymoj eb israel yin eb Benjamín tu', caywal tu' max yun yayc'ay eb masanil, max uktelay c'al eb yin c'am xewilal masantac'al bay yichcanil Gabaa.

⁴⁴A bay tu' max cam 18,000 soldado yet tribual Benjamín. ⁴⁵Axa juntzanxa eb, max meltzoi, max toj eb elaj bay tz'inan tx'otx', bay yetc'ulal tok ch'en sat ch'en chi yik Rimón, palta 5,000 eb tu' max cam bay yulak be. Max tzaklojc'al eb israel tu' yintak eb, masantac'al bay Gidom, max ayc'ay eb yuj eb. 2,000 soldado max cam bay tu' yuj eb. ⁴⁶Xan a yet jun c'ual tu' 25,000 eb soldado yet tribual Benjamín, a ton eb soldado caw wal k'ajan yin owal, max cami. ⁴⁷Palta ay 600 eb yet Benjamín max tojcan elaj bay tz'inan tx'otx'. Caneb xajaw max cancan eb bay sat ch'en yet Rimón. ⁴⁸Yinxac'al aymanil max yak' lajwok eb israel eb anima yet is tribual Benjamín, max tzoc'on cam masanil eb anima bay masanil conob, max mak'on c'apax cam eb no no', yetokc'al masanil tzet yetal max ilchaj yuj eb, c'al conoblak max yak'can tz'a eb.

A eb ix ix max oc yistzilok eb yet Benjamín maxto cani

21

¹A masanil eb israel tu', maxax yak' eb ti' bay satak Jehová bay Mizpa, tol c'am junok eb ok yak' is cutz'in yistzilok eb yet Benjamín. ²A yet max lajwi owal tu', max wajban ba eb bay Betel satak Jehová, masantac'al yet max k'ekbi ayok, max ok' eb max yalon eb: ³Mamin Jehová co Diosal, ach ayon et, ayon israel on ti', ¿tzet wal yuj xan max jay jun ti' jiban? ¿Tzet wal yuj xan lanan c'ayil jun tribual co xol ayon israel on ti'? ñi eb.

⁴Axa yet junxa c'ual xin, max aj wan eb israel tu', max watx'nen aj eb jun altar, max yak'on tz'a eb xajanbal satak Jehová c'al yak'on eb xajanbal yet junc'ulalil. ⁵Max c'oli k'anlen eb: ¿Mactxel co xol ti' maj betic' jetok yin wajanil bay Mizpa? ñi eb. Yujtol maxax yak' eb ti', tatol ay mac c'am chi toj bay jun wajayil tu' tojolc'al cami.

⁶A eb israel tu', caw wal ayoc eb yin cusc'ulal yuj tzet max yun eb yetok is tribual Benjamín, yet israelal pax ba eb, max c'oli yalon eb: A wal yet jun c'ual ti' max c'ayil jun tribual co xol ayon israel on ti'. ⁷¿Tzet watx' chi junej yet chi oc pax yistzil eb nak yet is tribual Benjamín maxto cancan ti'? Ayon ti' mayal jak' co ti' bay satak Jehová tol c'am junok on okto jak' co cutz'in yistzilok eb nak. ⁸¿Ay mi eb jet israelal ti' maj betic' jetok bay Mizpa yin wajayil satak Jehová? ñi eb.

Cax max naontek eb, tol a eb cajan bay Jabes yul yet Galaad, c'am wal junok eb tu' max betic' yin wajayil tu'. ⁹A yet max awji lista, c'am wal junok eb aj lugar bay tu' max tak'wi. ¹⁰⁻¹¹A yet max yaben masanil eb conob jun tu xin, max chektok eb 12,000 eb soldado caw wal tol jelan yin owal, yet chi toj

mak'lay cam masanil eb aj Jabes yetok espada, masanil eb winak, eb unin, c'al yetok masanil eb ix ix ay yichamil, yetokc'al eb ix ayxa winak max k'umej.

¹²A bay xol masanil eb Jabes tu' max ilchaj 400 eb ix k'opoj tol c'amtoc'al winak chi k'umej, max ilaytek eb ix tu' bay campamento bay Silo yul yet Canaán. ¹³Catatu' xin, a masanil conob tu', max chekon toj saylay eb nak yet is tribual Benjamín aycantok bay satlak ch'en bay yet Rimón, max awtelay eb yet chi oc junc'ulal. ¹⁴Xan max meltzojtek eb yet is tribual Benjamín, axa yak'on eb, eb ix ix max bet yicantek eb bay Jabes tu' bay eb, palta aytoc'al maj tz'aknaj yion eb yistzil masanil.

¹⁵A masanil eb israel tu' caw wal max cusaj c'ul eb yuj is tribual Benjamín is yet israelal eb, yujtol axcaxac'al tol max c'ayil Jehová jun tribual tu' xol eb. ¹⁶Axa eb yajaw yayji bay xol conob tu' max k'anej eb axca ti': ¿Tzet wal ok yun yilchaj pax is yistzil juntzanxa eb nak yet is tribual Benjamín ti', yujtol masanil eb ix yistzil eb nak, max c'aylayxac'al el junelnej? ¹⁷A yuj juntzan eb nak winak maxto cancan yin is tribual Benjamín ti' xan okto txecloj pax aj jun tribual ti' co xol, yet watx' c'am chi c'ayil co xol ayon israel on ti'. ¹⁸Palta ayon ti', c'am chi je' jak'on eb ix co cutz'in yet chi oc yetbiok eb nak, yujtol co masanil maxax jak' co ti' bay satak Dios, tol c'am chi jak' co cutz'in, bay eb nak yet is tribual Benjamín, xan a mac chi yak' is cutz'in, chi titcan catab yiban. ¹⁹Palta junjunc'al abil ay jun miman k'in chi chalay bay satak Jehová bay Silo, xi eb. (A ton tu' ay bay is nortéal Betel, bay yetc'ulal yayubc'ual be chi toj bay Betel chi apni bay Siquem, bay yetc'ulal sur yet Lebona.)

²⁰A eb yajawil yayji xol eb israel tu', max yatok eb jun k'anej ti' bay eb yet is tribual Benjamín is yet israelal eb: Chex toj e c'ubaj el e ba bay xolak an uva bay cawilal Silo. ²¹Watx' che yut e c'uban el e ba bay tu', cax c'am chex bili. A yet ok eltok bululok eb ix k'opojtak ix aj Silo canalwok bay tu', elanek c'apaxtek bay che c'ubaj el e ba tu', cax che yelk'anentok junjunok e yistzil junjun ex, cax chex tojcan bay e tx'otx'al. ²²Ta a is mam ma eb nak nuej eb ix k'opojtak ix tu', ok ul alon ayon, ok jal bay eb: Chi co k'an mimanc'ulalil ayex yin eb, yujtol maj ilchaj yistzil eb juj masanil yet max oc owal bay Jabes. Yetok c'apaxok, ti' wal may ex nak max e yak' eb ix bay eb nak, xan c'am chi oc e mul bay max e yak' e ti', con chi bay eb, cax caytu' ok jut jalon bay eb, xi eb yajawil Israel tu'.

²³Max cha' c'ul eb yet is tribual Benjamín yunen axca bay max al-lay tu', xan junjunc'al eb max yelk'anejtok junjun eb ix k'opojtak ix tu' yet lanan canalwi eb ix, cax max yiontok eb yin aymanil bay is tx'otx'al, axca tu' max yut watx'nen aj eb is conobal junelxa, axa cajay ec' eb bay tu'.

²⁴Ac'ala' juntzanxa eb yet israelal eb tu', max meltzojtok eb junjun bay is tx'otx'al, c'al bay is tribual.

²⁵A yet tu' c'amc'al rey bay xol eb israel, junjunc'al max el yunen tzet chi yochej c'ul.